

*ASO GAFUA, 22 IUNI 2015*

*Na nofoia le Nofoa e le Fofoga Fetalai i le itula e 3:00 i le aoauli.*

**TULAFONO TAU FAAOFI O LE FAATATAUINA O TUPE  
FAAOPOPO (NU.2) 2014/2015 & TULAFONO TAU FAAOFI O LE  
FAATATAUINA O TUPE 2015/2016 – felafolafoaiga i luga o le faitauga  
faalua**

**FOFOGA FETALAI:** E talitonu o lea ua tatou taunuu mai i le vaega mulimuli o le tatou Fonotaga i lenei vaega o le aso, e ala i le tatou lafo na toe faatu ona o le naunautaga o le tatou Malo ina ia toe faaauauina le talanoaina o le tatou Tala o le Tupe ma faagasolo ai le tatou Galuega pei ona tatou aofaga potopoto ai i lenei vaiaso ma lenei foi aso Fono. Ia, e momoli atu le agaga faafetai, e manatu ua maua le faasiliga malosi e ala i le tatou faiga malologa na tatou feagai ai nei. Ua maea foi le tatou taligasua ma e i ai le manatu ua lava taoso lenei fa itula o le a tatou faagasolo e ala i le faaauauina o le tatou Fonotaga. Malo le onosai.

E faamalo atu foi i le paia ma le mamalu o le tatou atunuu ua tatou mafuta, Ofisa Sili o Pulega aemaise foi o le faafofoga tapuai mai a lo tatou atunuu. Faamalo le folau, faamalo le galulue i lenei aso. E ofo alofa atu foi i nisi o le tatou Palemene ua tatou mafuta i Minisita aemaise foi o le mamalu o sui usufono, malo le faamalolosi mai ma le taupeau mai i le tatou Fonotaga i lenei aso.

E faia le tatou malologa o tulei saunoa le Afioga ia Maualaivao o le sui usufono mo le tatou Nofoa Tu Taulaga po o Samoa Aoa pei ona faalupeina i le tatou Fonotaga o taimi uma ma fatia ua sola ma aso ua alu. Tulai mai Maualaivao e faaauau le saunoaga.

**Afioga MAUALAIVAO PAT AH HIM:** Faafetai i lau Afioga i le Fofoga Fetalai i lenei foi itula o le aso ua toe taliu mai le faiga malologa i le Palemia ma le paia o le Kapeneta ma le mamalu o sui usufono, faamalo faafetai, viia le Atua i le toe taitaiina mai ma le saogalemu o lo outou soifua aua le faaauauina o le tatou galuega fai.

E faia le tatou malologa lau Afioga i le Fofoga Fetalai, sa ou fia tali atu i le faaulavea a le sui usufono mo Faleata Sisifo. O le mea muamua, faafetai tele o lea ua e saunoa aemaise foi o le itumalo o Nuu Tu Taulaga. O le ala tonu lava lea sa ou taumafai atu ai, ae le aoga ona faaauau lau lauga ae se i faamanino le mataupu lea. Ona o lo o fia faafofoga mai pea le tatou atunuu aemaise o le paia o le Maota ne ii nuu nei e taua o itumalo o Nuu Tu Taulaga ina ia faigofie ai ma aua ne i fesasiai aua out e le o taua lava se isi itumalo o paia ma mamalu, a o le itumalo lava ia o nuu Tu Taulaga i Sisifo. O nuu la ia e aofia i afioaga nei, o Elisefou, o Falelauniu, Korea, Laloanea, Puipaa,

Safune, Saina, Siusega, Talimatau, Tanumapua, Tapatapao, Toamua, Tuaeuleta, Tuvao, Vaigaga, Vaipoto, Vaitele ma Vaiusu.

Lau Afioga i le Fofoga Fetalai, e pei o le ala tonu lava lea na ou momoli ai le faafetai tele i le Afioga i le Taitaifono e tusa ai ma le auiliiliga a le Komiti o lea na faamaonia ai ma faatulafonoina nei afioaga e avea ma nuu o le itumalo Nu'u Tu Taulaga. Ou te talitonu foi sa faamaonia ma oo atu foi sui usufono mamalu ma faapena ona faamaonia, ua lava lea ou te tautala ma le ava ma le faaaloalo i mea sa ou asiasi i ai, ou te asiasi ma ou vaavaai, o le mea taua ua maua lou avanoa. Sa leai se.... a o lea ua maua le avanoa. Faafetai foi i le tatou Malo ua i ai se itumalo tele e mafai ona i lalo o au nei o le sui usufono o le itumalo. Ma i lau ia vaavaai i ai i le taua tele i le matou matamata i ai...

**Afioga Toeolesulusulu Cedric Pose Salesa Schuster:** Lau Afioga i le Fofoga Fetalai, o le fesili fia malamalama...

**FOFOGA FETALAI:** Ia se i tulai mai, o le a se mea Toeolesulusulu?

**Afioga Toeolesulusulu Cedric Pose Salesa Schuster:** Faafetai lava lau Afioga i le Fofoga Fetalai mo le avanoa, ae o le fesili fia malamalama ona o lea ua taua e le sui usufono pei ua maua o ia lea e fai ma sui usufono o Nu'u Tu Taulaga, ae pei e maitau atu o lea e le i faia le palota e faatino ai sui usufono ia, o le taimi nei o lo o avea ia ma sui usufono o le Au Palota Taitoatasi. E pei o le sao lea lau Afioga i le Fofoga Fetalai.

**FOFOGA FETALAI:** E fia faasaoina lou taimi Maualaivao se i tuu atu le avanoa i le sui usufono mo Faleata Sisifo.

**Tofa Lealailepule Rimoni Aiafi:** Lau Afioga, faafetai. Faafetai lava i lau Afioga i le sui usufono mamalu e tusa ai foi o le faauilavea i le saunoaga analeila. O le mea tonu lava lea na ou fai atu ai, aua tatou te oo i mea e le tataua ona tatou saunoa i ai. Ia, se i vaai la i le sese o mea la e lau mai? Ae le o taua mai Lotopa la e nofo ai, o Sinamoga, Alafua, Lepea, Vaimoso, o mea uma na e lavea i nuu nei. E le o i ai se sui o le taulaga i le taimi nei. O le taimi lenei, o sui usufono ia e saunoa nei, o sui usufono o le Palota Taitoatasi, e le i faia. O le mea na ala ai ona ou faauilavea lau Afioga, leaga na muamua lava tau Vaitele. O Vaitele, o lea e i lalo o le itumalo o Faleata Sisifo i le taimi nei ma le agai i le lumanai. O galuega foi na e faatino mai i ina, e leai se mea o faaletonu. E te pasi loa ma Vaitele fai mai tagata, "Leala, ou te fia palota ia oe." O le mea la lenei o lea ou te talanoa atu ai i le sui usufono, aua tatou te talanoa faapolokiki i le mea, saunoa pea o ia o le sui usufono individual. E lei i ai se sui usufono o le taulaga, o le taimi lava e fai ai, e tau atu ai e Lealailepule o le a alu i le taulaga, pe tumau pea i Faleata Sisifo, o le mea lenei. Ioe.

**FOFOGA FETALAI:** O lea ua maua le finagalo o le sui usufono, e tataua pea ona faamanatu atu i le faafofogaaga a le tatou Maota, o le saunoaga lava ia a le sui usufono mamalu, o lo o saunoa i le tulaga faalauaitele. E le natia foi, po o fea lava le taga tatou te agai i ai, o le Tulafono o lea ua maea ona pasia e le Maota. E ui lava e le i tuu maia le taimi e faamamaluina ai, ae atonu

lava o le fuafuaga a le sui usufono, o le sui usufono e mataala tele ua amata ona taamilo. Ae malilie sui usufono, e ave pea le avanoa i le sui usufono ma lana saunoaga, e le o ni ai avea, o le tulaga lava ia i le avea ai o lau Afioga ma sui usufono mo Faleata Sisifo aemaise foi o se tasi o sui usufono, ia, atonu e leai se afaina i le saunoaga a le sui usufono. O lo o faagasolo pea lana saunoaga i lona agaga mama, o tagata uma nei o lo o i totonu o le itumalo, o lo o i ai foi i totonu o alaafafaga nei o lo o faatino ai le Tulafono.

Se i tulai mai Maualaivao.

**Afioga MAUALAIVAO PAT AH HIM:** Faafetai lava i lau Afioga i le Fofoga Fetalai faapea foi le Afioga i le sui usufono mamalu o lo o faalavelave, ia a o faafofoga foi uta i talanoaga ma se manatu, e le o toe po se lilo, o lea ua uma ona saunoa le Fofoga Fetalai, ou te le iloa la po o le a se... E tele foi taimi e faapea mai ai le sui usufono mamalu, o lea ua le toe i ai ni sui usufono mo le Au Palota Taitoatasi, ona ou fai atu lea, “A o a ea nei mea e nonofo atu, ni... Ia o le agaga lena. Ia, a o lea foi ua e fai mai, ua le malamalama la au i le tulaga lea. O lea foi ua ou talanoa i le vaega lea, ne i t e i foi ua e saunoa mai ma e faifai mai e leai ni sui usufono o le Palota Taitoatasi a o lea ua uma ona ou faamalulu i le matou itumalo lea, ioe. Se lau Afioga, se soia ia e te taele pispisi, ae alofa mai se i faaauau lau lauga. Ae o lea faatoa taunuu mai nisi o afioaga o le itumalo Tu Taulaga i sasae, e i ai la vaega nei i sisifo, i nuu uma lava nei e aofia i le itumalo Nuu Tu Taulaga i sisifo e i ai Alafua, Lepea, Lotopa, Moamoa, Pesega, Seese, Sinamoga, Tanumapua, Tuae, Tuanaimato, Tulaeletai, Ululoloa, vaega o Alamagoto, Vailoa, Vaimoso ma Vaitoloa. A faaopoopo la nuu nei, e 34, 34 nuu o le Nuu Tu Taulaga i Sisifo, lea e i ai au nei.

Lau Afioga i le Fofoga Fetalai, o le mea lena ou te faafetai ai i le Taitaifono o le Komiti lea, ua ou fiafia ua ou maua se itumalo e sili ona tele, e fetai mo au, e talafeagai. A o lau taamilosaga i afioaga nei, e taua, lea ou te iloa ai, e moomia galuega, ae fia faaopoopo. O le mea lena sa ou fia talanoa atu ai ma ou fia asiasi i le Afioga i le Minisita...

**FOFOGA FETALAI:** Malie Maualaivao se i tulai mai le faauilavea a le sui usufono mo Gagaemauga Nu.2.

**Tofa Levaopolo Talatonu:** Lau Afioga i le Fofoga Fetalai, na o sina mea lea ona o lea ua faalua ona lau nuu i i, e le o sau lava Lotopa i le mea lea e afio ai, po o le mea o la e misi lava Lotopa i le mea lea e afio ai le sui usufono mamalu.

**Tofa Lealailepule Rimoni Aiafi:** Lau Afioga, ou te faamalulu atu lava i lau Afioga ou te le toe... E tatau ona faafofoga lelei mai le sui usufono mamalu. A faafofoga i ai lau Afioga ma Samoa i le saunoaga a le sui usufono mamalu, tusa o lea ua faaleaga maua ma Aveau. E moni lava lau tala, leaga o lea fai mai na taamilo i itumalo nei o lea e moomia galuega. E le o se itumalo lea o Mauala, sa tatau ona saunoa po o le a sana galuega na fai i le Au Palota Taitoatasi. O le a sana galuega na fai i le taimi na Palota Taitoatasi ai ma Individual, le aufaipisinisi ma tagata sa palota i ai? A o lea ua saunoa sa taamilo i itumalo e tele mea e fai. Leai, taatia mai pea matou itumalo? O lea ua faatino mea uma i itumalo na, o le falemai o falepuipui, o fale fuimu ma

fale uma, o fale aau, o fale fono, o auala, moli, eletise, vai, ua uma ona fai uma, ua selau pasene. A o lea ua saunoa mai sa taamilomilo i itumalo, sa ou ola mai i ina, o lou pute lena e tanu ai i ina. Ioe. Alu pea oe i le mea sa e faipule ai...

**FOFOGA FETALAI:** O lea ua maua le finagalo o le sui usufono. E pei lava ona e.... E faamalulu atu i le faafofogaaga a le tatou Maota, ia aua ne i vaatele i o outou finagalo, o lea lava sa... A silasila foi i le faamalamalamaga na ou avatua, o le itumalo lea e taua nei o le Au Palota Taitoatasi, ia o Samoa atoa e aafia uma ai itumalo o Faleata Sasae ma Faleata Sisifo, ma Samoa atoa. O le lauga la a le sui usufono, o lo o agai tonu i le mea o lo o i ai tagata o lona itumalo, o lea foi ua ou faamalulu atu i lau Afioga i le sui usufono mamalu, o lea e tee le uluga i finagalo o i latou o lo o alaala tonu i itumalo ia o Faleata Sasae ma Faleata Sisifo. Ona ou talosaga atu lea i lau Afioga i le sui usufono mamalu, faamama maia le sausau i lea pito, o lea e malamalama lelei Samoa o potopoto, o le fua lea ua amata ona tusi ai tuaoi o tatou itumalo fou pe a tatou aulia le palota mo lona faatinoina. A o le taimi lenei, tatou agai i le tatou Tala o le Tupe ona manino lea ma malamalama, a o lo o sagatonu lou finagalo, e faapena foi le taumafai mai o sui usufono mamalu o lo o seei i itumalo ia i le taimi lenei.

O le talosaga lea Maualaivao, o le a lou finagalo ae see ese ia o lea ua manino ma malamalama le faatulagaga o tuaoi taoto o itumalo o lo o i ai nei atoa ai ma le faiga fou o lea o le a tatou alu ai, ae mei ia i se isi mataupu e faaauau le saunoaga Maualaivao.

**Afioga MAUALAIVAO PAT AH HIM:** Faafetai tele lava i lau Afioga i le Fofoga Fetalai. O le mea taua pei ona ou fai atu, ia manino ona faaauau ai lea o lau lauga, aua e le mafai lava, e faavaatua lava. E faamalulu atu i sui usufono mamalu, leaga ou te le o taua lava le paia o le itumalo, faafofoga foi, e leai ma se upu faapea o faaeleelea ai oulua o leaga se lua galuega o fai, e leai. Na pau le mea e eseese mamao lava itumalo nei, ma itumalo o Nuu Tu Taulaga. Ia o le faaupuga lena, o itumalo Nuu Tu Taulaga, e ese mai ma Faleata Sisifo faapea foi Faleata Sasae. E eseese mamao. E pei o le tulaga lea, ae ui i lea, faafetai i lau Afioga i le Fofoga Fetalai, i le faafofoga mai foi a lau Afioga, e le i maea atu lau talosaga i lau Afioga i le Minisita mo Galuega a le tatou Malo, ona o le suavai lea ua ou vaai atu ua vili atu, aua e vili loa le vai lea i gauta o Ululoloa, e faapena ona maua ai le vai taumafa o Aleisa. Ae o lea ua matou vaai atu o lea e pei o le a toe mimilo mai i tai lau Afioga i le Minisita. Ia malie lou finagalo pe maua se avanoa e faaola atu ai i Aleisa lena vai ma maua ai le vai taumafa o Aleisa. Faamalulu atu foi o lo o i ai foi auala i Aleisa aemaise foi o Moamoa. O Moamoa i lau matamata i ai lau Afioga, e i ai auala na o taavale tau e o ai ao la e taumafai i ai nai pikiapu e le mafai ona o i ai nisi taavale. Ao i la i nuu nei tu taulaga e i ai Moamoa, ua manaia ai auala i nuu i tua. Ua ta fiafia foi o lenei ua taua nei afioaga o nuu tu taulaga, atonu o le a faaleleia atu le taulaga ma faalelei atu ai ma ia vaega o le atunuu. Lau Afioga i le Fofoga Fetalai sa ou alu i le tatalaina o se tasi o hall i Aele. Sa fai le saunoaga a le CEO o le Matagaluega o Aoga na manaia i lau faalogologo ua aoga fua le fanau. Ua leai foi se isi e le o toe.....e aoga uma po o tagata e disable po o moomia manaoga faapitoa po o ai lava le tamaitiiti ma le teine, ua mafai ona aoga e le o toe teena se isi. O le auala lena

e taua ia te au lau faalogologo i ai. Faafetai ua maua lea avanoa tutusa. Lau Afioga i le Minisita o Aoga o lau matau lena e tusa ai ma le saunoaga a le Pule Sili a le Matagaluega o Aoga. Malo faafetai i lau Afioga i le Minisita o Aoga. Atonu foi i lenei itu, ua le lelei sau talanoa i le mea lea, na ou tapena mai ou te talanoa uma i vaega nei, ae o le ua faavaatuaia au i le mea lenei e aua nei ou talanoa i.....ao lea ua saunoa lau Afioga i le Fofoga Fetalai. E toe tasi lava si au fautuaga lea e avatu i le matou Matagaluega o le Soifua Maloloina. Faafetai i lau Afioga i le Minisita o le Soifua Maloloina, manaia le falemai manaia le auaunaga, ae i ai lava vaega laiti lea e faaleleia atili, o lo o faafofoga mai le tatou aufaigaluega, ma e o lo o galulue e tautua gasegase o lo o o atu, o lo o i ai lava le upu lea fai mai, “ e faailogalanu ia isi taimi. Ou te le iloa faamama le upu lea, ae e le tutusa taimi uma, ai o le taunuu atu o gasegase po o ua tigaina i lea taimi ua tuneva le aso, ia e faapena foi le gagana latou te faafeiloai ai e o lo o gasegase, ae o lo o moomia e gasegase ia ni tali malu a ua tapuni le falemai. Ai ua oso faafuasei se gasegase, ia e faapena lava le tulaga e i ai. E pei ona ou fai atu i au lauga i le taimi ua sola, e amuli lava ni fualaa au fofoga o le aufaigaluega e moomia e le gasegase. Lau Afioga i le Fofoga Fetalai, ou te fiafia ina ua taunuu le miti lea. Sa ou lauga i le tulaga lea e uiga i le itumalo lea o Palota Taitoatasi, sa ou faapea i lau lauga faataupou. “O le taimi lenei agai i luma, e le toe i ai se tagata e tau o se tagata Saina, e le toe i ai se afakasi po o se tagata uli, o Samoa ua tasi Samoa” o le a le mea lea ua i ai, o lea ua taunuu le faamoemoe. Faafetai i le tatou faigamalo, le Palemia faapea foi le mamalu o le Fono Faitulafono o le tatou Malo, o lea ua tino mai, ua tasi lava Samoa. E le toe i ai ni tagata faapea e faailoga lanu. Mo le taimi nei, o le agaga lena. Faamanuia le Atua i lau Afioga i le Fofoga Fetalai, faapea le mamalu o le Palemene.

**FOFOGA FETALAI:** Tulai mai lau Afioga i le Minisita mo le Soifua Maloloina.

**Afioga Hon Tuitama Talalelei Tuitama:** Ua ou tulai atu ona o se mataupu e paopapa i le faafofogaaga a le Fonotaga faapea foi le atunuu, ne’i te’i ua avea ma taiala a nisi foi lauga e mulimuli mai. Ou te iloa e pau le atunuu o lea ou te mautinoa o lo o i ai le tulaga lea o le faailoga lanu, o le tuaaiga lea e masani ona fai e tatou foi nei e lanu eena ma lanu uli vaeatu le faafofogaaga i atunuu o tagata papae. E maua ai la le faaupuga lea o le faailogalanu, ona e le o manino mai i le saunoaga a le sui mamalu, po o le a le ituaiga lanu lea o lo o faasinolino lima i ai le tatou atunuu. Aua o lau vaai i le tatou atunuu, e na o tagata Samoa lava lea e i ai. O lea foi na faauma mai saunoaga a le sui mamalu e le toe i ai se isi lanu o i totonu o Samoa ua na o Samoa, ae po o ai la lea e faasino i ai le upu lea o le faailogalanu. Ina ne’i te’i ua avea ma tulaga matuia i le faafofoga mai a le aufaigaluega, ae lelei le faamnino po o le a le lanu lea o lo o faailoga nei i uta i le falemai. Ae lagona foi le faanoanoa aua o le uso nei o lea ma te galulue faatasi, ae o lea la e le musumusu mai ia te au ma fautua mai foi e tusa ai ma le ma galuega fai faatasi ae o lea ua afifi mai i totonu o le Fonotaga lona faiva e sasaa atu ai lona lagona, ae o le mea tonu ia e moomia mo le galulue faatasi o le Minisita ma le Minisita lagolago i le tauaveina o le galuega. O le tulai atu lea ma le faaaloalo tele. Ae mo le silafia e lenei Maota, e le o nofoai le Matagaluega i nisi foi o leo sala ese faapea o lo o agiga pea i le faafofoga a le aufaigaluega, lea la o lo o galulue ai nei le au

faigaluega, ma ua uma foi ona pasia e le Kapeneta ia le grievance policy lea sa faafofoga ma silasila i ai le atunuu ua i totonu o nusipepa le faafetai a le Ombudsman, lea na tusitusia e faailoa mai ai le agaga fiafia tele ona ua amata ona agai le silasila a le Matagaluega i le foia o faafitauli ia. Atonu e tasi lea vaega o faailoga lanu lea o lo o taua nei. Ae e i ai lava lou talitonuga, afai o se tulaga i le auaunaga ma le faatinoga o le auaunaga atonu e talafeagai lea, ae ou te tau atu ma le agaga faamaualalo i luma o le tatou Fonotaga, ma le faafofoga a Samoa, e leai o isi foi tagata Samoa la e faigaluega i le falemai. E tele lava i Samoa, e itiiti lava nai tagata ese la e i ai. Atonu la o nai tagata ia mai fafo, o lea e faailogalanu mai agai mai i tagata Samoa, aua e le toe faailogalanu le isi tagata Samoa i le isi tagata Samoa aua o le lanu lava e tasi i tatou uma. O le faamalamalama lea lau Afioga i le Fofoga Fetalai ne'i te'i ua toe uia foi e se isi lauga ae le matagofie i le faafofoga mai a le Mataluega, le tusitusilima faapea a le tatou atunuu aemaise o taitai, i le faatinoga o le latou galuega i le tulaga lea o le faailogalanu.

**FOFOGA FETALAI:** Malo faafetai i lau Afioga i le Minisita. E manatu foi o lea ua faaiu mai le saunoaga a le sui mamalu. Ma e talitonu o lea ua manino ma malamalama ai le mataupu. Malie le Taitai o le Itu Agai, o lea foi o le a tatou toe toso le aulapa mamao ao lea ua manino ma malamalama.

**Afioga Hon Palusalua Faapo II:** E leaga ua te'i le itu lenei i le le galulue faatasi o le Minisita ma le Minisita lagolago. Sa saunoa le Palemia, o la outou vaega, e galulue faatasi le Minisita ma lana Minisita lagolago. E le tataua ona aumaia i totonu o le Maota nei mataupu e tataua ona foia i tua.

**FOFOGA FETALAI:** O lea ua manino. Soia ia e te tafutafu afi.

**Afioga MAUALAIVAO PAT AH HIM:** Lau Afioga i le Fofoga Fetalai, e faapea lava, o le fili lava e le moe. E faapena lava ona taulama, o le a sina tamai upu e....., ae faamalulu atu i lau Afioga i le Minisita, vaeatu lau Afioga i le Fofoga Fetalai. E leai se agaga faapea, sa ou tau faamalamalamaina atu i se upu faigofie, ae faamalulu atu e leai se faailogalanu i le tatou Matagaluega. Ma ou fai atu, atonu e o atu gasegase ua vaivai le afaigaluega, ae o lo o faatino le latou galuega lelei mo le atunuu. O le agaga lea, malu ave i fale lou finagalo, ou te faaaloalo tele, o oe o le Minisita a o au e lagolago, ou te lagolago i ou tiute ma galuega. O lo o faafofoga mai le tatou Matagaluega, o le agaga lena, e le faapena le agaga o tatou. Ao le agaga moni lava e tau faamatala ai, onosai pea i taimi uma, po o le tuneva o le po, po o le a le taimi, onosai pea e faaali pea o tatou foliga fiafia i le atunuu pe a afifio atu. Faamanuia le Atua i faauluuluga o Matagaluega eseese faapena le latou auaunaga, ia maua le laugatasia o le auaunaga ia maua e le tatou atunuu.

**FOFOGA FETALAI:** Faafetai saunoa i lau Afioga i le sui mamalu, malo foi le onosai, o lea lava e taumafai e tau fofo atu foi finagalo o lea itu o le Maota, ae o lalo lava e saili ai Malo. Malo foi le tauatai, ma le foaina mai o manatu tuusasa o le lua va faafeagai ai ma le Afioga i le Minisita. O lea foi ua saunoa le Minisita, ou te manatu ua malamalama ma manino le lua

pitolaau. Ua avanoa le Maota mo se sui usufono e fia saunoa. O lea ua oomi mai le moli a le sui usufono mo Anoamaa Sasae. Tulai mai lau Afioga.

**Tofa ALO FULIFULI TAVEUVEU:** Faafetai i le avanoa i lau Afioga i le Fofoga Fetalai. O le maua o lenei Maota i le afio a lau Afioga i le Fofoga Fetalai, afio le Afioga i le Palemia ma le Kapeneta, afio foi le Taitai o le Itu Agai, aemaise foi le mamalu ma le paia i Afioga i sui mamalu. Ua tatou faatasi foi ma Pule Sili o Matagaluega i lenei itula o le aso, aua le faamoemoe o le Tala o le Tupe i lenei tausaga. O lea foi e susu mai le susuga i le Failautusi ma le mamalu o le aufaigaluega a le tatou Maota fono, ia faamalo faafetai. E faafeiloai atu foi i le tapuaiga i le Afioga i le Ao Mamalu o le Malo, lau Afioga Tupua Tamasese Efi ma lau masiofo. E faapea foi ona faafeiloai atu i lau Afioga i le Fono o Sui tofia, lau Afioga Tuimalealiifano ma lau masiofo. O le tapuaiga mamalu foi i le vaega o faamasinoga, Afioga i le Faamasino Sili ma le mamalu o le Ofisa o Faamasinoga. O le paia foi o ekalesia a le tatou atunuu o lo o nonoina manuia o lo tatou atunuu. Malo le nofo tatalo. E faafeiloai atu foi i le tapuaiga a Samoa, le afio o Aiga ma Tama, o Tama ma o latou aiga, usoga a Pule ma Tumua Ituau ma Alataua Aiga i le Tai ma le Vaa o Fonoti. Malo le tapuai. E le faagalo foi le tapuaiga a le tatou motu i sasae, afio le Kovana sili ma le Lutena Kovana, le Peresetene o le Maota, Maota fono ma le Fofoga Fetalai ma le mamalu o Maota e lua. Afio le afioga i le Faamasino sili, o le paia lava lea ia Sua ma le Vaifanua, Fofoga ma Aitulagi Ituau ma Alataua, Saole ma le Launiu na Saelua aemaise o le afio o Maopu. Afio le Faatui ma Tootoo ma oe le Manuatele.

E avea foi lenei avanoa ou te faatalofa atu ai i le paia o si ou itumalo, ou te manatu e le toe faalupeina le tatou itumalo aua o le itumalo ua uma ona faataoto ona paia o le a le toe oo i ai se tautalaga a la outou sui usufono, faamalo le tapuai, malo le nofo tatalo, o lea ua aulia mai lenei vaega o le tausaga, a o alofaiva pea le Fonotaga a le tatou atunuu, ae a le faamoemoe o Samoa mo a taeao.

E avea foi lenei avanoa e momoli atu ai le faafetai i lau Afioga i le Palemia po o lau Afioga i le Minisita o Tupe ona o le faamoemoe lava o lenei Fonotaga o le talanoaina o le faamoemoe ma le tamaoaiga o le tatou atunuu aua lenei tausaga faaletupe o le a amatatia i le masina fou. Faafetai faafetai i galuega lelei. O lea lava ua maitauina o lenei lava tupe faasoasoa o lea ua faaulutala mai e faapea, o le faavae o le Tala o le Tupe i lenei tausaga, o se faasoa utiuti ma le le lava. Ae talitonu le taofi, e le sese lea manatu, aua o le upu moni, sa outou galulue ma tausaili, sa saili, o fea a maua ai ni seleni e faatino ai lenei tausaga fou o le a savalia. Peitai o le maitau a lenei sui usufono, a lea ua faafofoga le tatou atunuu ma silasila foi le Maota nei, ou te talitonu e ui lava ina pau nisi vaega o le tatou sailiga mo lenei tausaga mo le faamoemoe, a o lea lava ua tino mai o lo o lelei le faatulagaina o tupe mo atinae a le tatou Malo. O le mea sili lea ona taua, aua a le lelei le fuafuaina o nei seleni aua atinae a le tatou atunuu, atonu o le a tele foi se faaletonu mo le soifua manuia o tatou tagata. O le faatulagaina la o seleni o lenei faamoemoe o le tatou atunuu, o le a leai lava se tala a lenei sui usufono. Ui lava i lea, malo faafetai saili.

O le vaavaai atu foi i le Tala Faatatau o Tupe pei lava ona aumai, o le tupe faasoasoa o lenei tausaga, o le manatu lava lea ua aumai o le tatou Malo, e faamoemoe lenei tupe i talosaga a le tatou atunuu i le tupe maua. O le a le

tupe ua aumai, e ao ona tatou saili ma fuafua i ai mo lenei tausaga. O le mea foi lea o le a le tagialao ai lenei sui usufono, ou te manatu ua silafia lelei e le matou itumalo, o lea lava e galulue le Malo e saili seleni aua lava atinae. E tele atinae lelei lea ua faatamaoai ai le tatou atunuu e afua ai foi ma le matou itumalo.

Ae ao foi ona avatu ni talosaga i luma o le tatou Fonotaga aemaise o le mamalu o le Fono, ona ou faapea lea, ou te avatu lava le faafetai muamua i le Afioga i le Minisita mo le Siosiomaga ma Punaoa Faanatura, ua malosi lava le mafaufau ina ua i ai le faamoemoe a lau Afioga ma le Matagaluega o le a faataunuuina le talivai a le nuu lenei o Lalomauga. E pei lava ona silafia, o le tasi lava nuu sili ona faigata lenei o le itumalo ona o le malosi o le vaitafe o lo o i ai. Ae ui lava ina maotua e tau le vaai i ai le toatele o le tatou atunuu, a o lena ua i ai le faamoemoe o le a amata se galuega lelei e le tatou Malo mo le soifua o nei tagata ua leva ona pologa ona o le malosi o le vaitafe. Malo faafetai.

E faapea foi ona avatu pea le talosaga e pei lava ona avatu i tausaga uma lava talu ona ou nofoia lenei nofoa, e tatalo atu ai pea ona o le taligalu o lenei nuu o Falefa, aemaise foi o Sauano o le nuu la e i tua e tau le silasila i ai le mamalu o le tatou atunuu, a o le upu moni, o le taimi lava e oo i ai se pagatia o se Tsunami, ia ou te manatu e leai se na nuu. O le mea lea e tatalo atu ai ma le faaaloalo, se i e silasila ifo. O Falefa, e pei lava ona avatu i lau lauga faataupou o le taligalu ua uma ona faatulagaina o le a fai, ae oo mai nei, e manaomia lava lau Afioga ae le i afaina lenei nuu ma le itumalo. E tatalo atu ai ma le faaaloalo, se i e tagai ane i lea vaega o le itumalo.

Ona oo atu lea i le Minisita mo Galuega, Felauaiga ma Atinae Eseese, e momoli atu le faafetai tele i lau Afioga i le Minisita ona ua faataunuuina nisi tulaga o lenei itumalo i auala o Manunu, tasi lenei auala ua matua afaina atu lava, e amata atu i Saoluafata e oo atu i tua, peitai, o lea ua amataina le galuega o le faaleleia o le galuega. E ui lava ou te le iloa pe faata, a o le mea sili o lea ua faata, atonu lava e i ai ni tupe e totoe o lenei tausaga, ae tataua lava ona faata. A o le tulaga lava ia o le galuega, o la e ua silasila le pulenuu ma le afioaga foi o lea ua faalelei atu le latou auala.

E faapea foi ona momoli atu le faafetai ona sa ou oo atu lava i le tulaga o le auala i Lalomauga, aua o le auala e tasi lava le pasi e alu i le nuu lenei, aepeitai, ua tau le fealua'i le pasi i lena vaitau ona o le faaletonu o le auala. Aepeitai o lea ua uma ona teu lelei, ae talosia o le a toe alu foi i ai se ta pe a faalelei, ae faafetai atu ona o ia vaega.

E momoli atu le faafetai tele ona o le tasi faamoemoe o lenei itumalo aemaise lenei nuu o Falefa, e pei lava ona avatu foi le tatou feiloaiga i le fono tele lea na mavae atu nei lea na aafia ai le tatou atunuu, ia, o le auala galue o lenei nuu, e momoli atu foi le faafetai ona ua uma ona oo moli, ona o le toatele o aiga o lo o nonofo ai, o lea ua faataunuuina moli ae talitonu le taofi ua maea lena vaega. Aepeitai, e manaomia lava le faaoo atu o le auala galue lea i uta aua lava le faaleleia atili o faatoaga, aemaise le toatele o le alaafaga ua tele lava ina o i tua ona ua tau fefefe tagata e nonofo latalata i le sami. O le mea lea ou te tatalo atu ai ma le faaaloalo se i tautuana ifo le tulaga lea o lenei alaafaga ina ia faaleleia, afai foi e le o lenei tausaga, atonu ou te toe foi mai i lea tausaga, ae afai foi e leai, atonu foi o lea e faafofoga mai le atunuu ma lenei itumalo, o lea lava ua tuupepa e a outou Afioga le tulaga o le faamoemoe mo mea e faaleleia.



Ona alu alu ai lea o le faamatalaga a lenei sui usufono, e momoli atu le faafetai tele i lau Afioga i le Fofoga Fetalai aemaise foi le mamalu o le tatou Fonotaga i lenei aso, malo faafetai, ia manuia tele toe taimi o lenei aso. Soifua ma ia manuia.

**FOFOGA FETALAI:** Malo faafetai saunoa i le sui usufono mamalu mo Anoamaa Sasae lau Tofa Alo Fulifuli Taveuveu. E manatu ua faafofoga ma le manino le Afioga i le Minisita o Tupe aemaise o le Afioga i le Palemia ma le Kapeneta.

Ia, o lo o faagasolo pea le tatou galuega, ua avanoa le Maota mo se isi sui usufono e toe fia saunoa. Ia faasolo maia i ina, e manaia pe a sau ai i le faalau lena le sui usufono mamalu mo Aleipata Itupa i Luga.

**Tofa FAGAAIVALU KENRICK SAMU (Aleipata Itupa i Luga):** Faafetai atu i lau Afioga i le Fofoga Fetalai e tusa ai foi ma le avanoa ua tuuina mai i lenei itumalo o Aleipata Itupa i Luga se i taumafai atu ai foi sina sao puupuu i lenei Tala Autu o le Tupe.

E muamua ona ou faatulou i le Maota nei i le afio o lau Afioga i le Fofoga Fetalai aua o lau Afioga e te faatonu folauina le sa o le atunuu. Ou te faatulou atu foi i lau Afioga i le Palemia aemaise foi o le mamalu o le Aiga Kapeneta ma lena Itu o le Malo. E faatulou atu foi i lenei Itu i le afio o lau Afioga i le Taitai o le Itu Agai ma le Sui Taitai ma sui usufono uma o le Maota o le atunuu.

A o le i avatua se sao puupuu o lenei itumalo i lenei Tala o le Tupe, e muamua lava ona momoli le faafetai i lau Afioga i le Fofoga Fetalai e tusa ai o saunoaga i le taimi ua sola, ona o se tasi foi o tamalii o lenei itumalo ua faailagi le folauga, o le sa tautua foi i le nofoa o lenei itumalo i le taimi ua sola. E talitonu ua lagona foi e le paia o le nofo a alo ma le aiga, ae le gata foi i le tatou Malo i le faaaloalo, a o lea foi ua e saunoa i le taimi ua sola e momoli atu ai le faamalo ma le faafetai.

E le faagaloina foi Afioga i Ofisa Sili o Pulega ma Pule Sili faapea Malo ma Faalapotopotoga i tupu ma tamalii aua la latou fatuaiga tausii aua o latou o lo o vae ma lima i ai le tatou Malo aua lava galuega fai ma le tauatiaeina o si o tatou Malo.

Ou te fialia foi e faatalofa atu i si o matou itumalo o Aleipata Itupa i Luga mai lava i Ulutaotogia i Vailoa seia paia foi si o matou nuu i Lalomanu. O le paia lava lea aua le afio o le Tuiatua na Faanofonofu, afifio le Falefia o Alii, afio Amituanai o le Maopu o le Tuiaana, Susu i laua Suafa, le Tofa i le Tootoo ma le Igoamatua ma le mamalu ia Saleaamua. Afio lau Afioga i le Sao Fetalai, afifio le Falelima o Alii ma Alaalamalae ae tainane le mamalu ia Tunumoso ma Saleleaalii. Afio lau Afioga i le Sagapolutele o le Tama a le Malo, afio le Matua o Falanaipupu ma le Usoalii, ae tainane le mamalu ia Saoluafata.

E le faagaloina foi le aufaigaluega paia a le Atua o lo o faapena ona nonomanu aua se manuia o lenei itumalo aemaise si o tatou atunuu mai le tatou Tama i le lagi.

Lau Afioga i le Fofoga Fetalai, e muamua ona momoli atu le faafetai ma le faamalo i le Afioga i le Minisita o Tupe po o lau Afioga foi i le Palemia, aemaise le Matagaluega o Tupe aemaise foi i latou uma sa togimaa ma

faitonu i lenei Tala o le Tupe, aua e talitonu o atinae uma lava aua si o tatou atunuu mo le lumanai.

O le a muamua lava manaoga o lenei itumalo e manatu o le fa lenei o tausaga talu ona i ai i totonu o upufai a le atunuu, atonu o le fa foi lenei o tausaga o tuitui atu pea ma tatalo atu i le tatou Malo i nisi foi o galuega mo atinae a lenei itumalo. O le a muamua atu le Minisita mo Galuega, Felauaiga ma Atinae Eseese.

E momoli atu le faafetai i lau Afioga i le Minisita mo Galuega, Felauaiga ma Atinae Eseese, faafetai i le auala i Samusu i Lalomanu, faafetai topule. Ou te talitonu o le tasi lenei auala taua i totonu o lenei itumalo, aua e le gata ina faasee mai ai latou o lo o nonofo tulata i le sami, ae ua mafai foi ona galueaiina ai nei eleele mai le tele o tausaga ae o lea ua galulue ma nofoia, ua faatinoia ai foi faatoaga. E momoli atu ai le faafetai i lau Afioga i le Minisita mo Galuega mo le auala ua faapena ona tatalaina i le vaiaso na se i mavae atu nei.

O le lona lua o faafetai mo le matou auala o le Tsunami, toetiiti ona faamaeaina lea, ae momol tele atu le faamalo ma le faafetai, ua leva lava ona taumafai atu. O le taimi nei o lea ua faatino matou auala Tsunami, o auala ia e sosola mai ai tagata pea oo ina tutupu mala faalenatura. A o le tatalo foi a lenei itumalo, o nai o matou... e taatia atu pea, e talitonu e le faigofie lau faasoa, ae ia alofa ae i nai o matou auala mai Ulutogia, Vailoa ma Lalomanu, e taatia atu pea i lau Afioga, a alu alu suaga o le vaatele e te manatua Tae i Atua, faafetai i lau Afioga.

O le auala lea i Tiavea, o le auala lea e agai sao lava i tua i lenei itumalo, se i e alofa ane i le auala lenei. O le auala ua leva ona faatamaia le auala, ae pei lava ua fai ua soo se taimi lava e tafe ai le vai, ua faapena ona aafia ma tau tutupu mai ai faalavelave, aemaise lava o latou e fou atu i tua e uia le auala lea, ona e tau i ai lava nai faalavelave e tutupu mai. Ae taatia atu i lau Afioga, se i e silasila ane i se taimi vave po o lenei foi Tala o le Tupe, ae faataunuuina ai le auala lea i Tiavea.

O matou taligalu, o le taligalu i le matou pitonuu lea o Lata, o le tasi lea pitonuu e le i leva lava ona uma le taligalu fou sa i ai, ae ua faapena loa ona faatamaia i le Tsunami. Po o le a se finagalo o la e tele le maa la e fau i le matafaga se i tulou le Maota ma le faafofoga mai a Samoa, na o sina masini lava e toe agai atu e toe faufau le taligalu lea ma le faaaloalo.

O le tatou Pulega o le Suavai, atonu o se toatuga lea o lo o feagai pea ma lenei itumalo, aemaise lava i lenei taimi o lea ua amata ona agai ae ma nofoia nofoaga maupuepue. O le tatalo i lau Afioga, pei e manaia le ala fou lea, ae faataatia atu ai nai paipa mo le suavai o lenei itumalo.

Ia o le Faalapotopotoga o le Malosiaga Faa-Eletise, o lea ua faatuina i le matou itumalo le eletise e maua i le savili, atonu o se atinae lelei foi lea mo lenei itumalo, ae po o le a se silasila a lau Afioga, pe le ono maua ai ni faamamaavega i nai matou pili i tua pe le pau ai le tau o le eletise o lenei itumalo, aua o le matou savili ma le matagi ua faapena ona maua ai lenei atinae o le eletise e maua i le savili. E le gata i lea, o nai o matou moli eletise, pou moli, e faigofie lava le mataupu ae pei e le o faia lava e le aufaigaluega, e tele matou moli auala o lo o pepe, se i silasila ane i ai lau Afioga ma le Malosiaga Faa-Eletise ina ia tau....

**FOFOGA FETALAI:** Malie le sui usufono se i tulai mai le faauilavea a le Minisita mo Galuega, Felauaiga ma Atinae Eseeese.

**Afioga Hon Manualesagalala Mati Tuigamala Enokati Posala:** Lau Afioga i le Fofoga Fetalai, atonu foi e aoga lenei avanoa se i tau... e manaia le saunoaga a le sui usufono mamalu. O le tele lava pei o le tulaga lea i le auala lea i Tiavea, o la e fai nei le fonotaga a le Pulega ma le mission a le World Bank na malaga mai e galulue faatasi ma Ausetalia, ua maea le tulaga foi lele i le Evani lea na tulai mai ona fai lea o le latou suesuega. O auala laupapa uma lava lea e i totonu o Upolu atoa ma Savaii, o le latou suesuega lena sa faatino, o la e omai e i ai le latou fesoasoani e toe faaleleia ai le maintenance o auala laupapa ia. O le vaavaai mamao lena, leaga o polokalame nei, o le 2009 tulai mai le Tsunami, a o le vaiaso na tea nei o lea ua tatala le galuega lea, ua fai lava si umi o le process ina ona o le tulaga a le Faletupe o le Lalolagi ma le latou foi fesoasoani na tulai mai. A o le mea taua, o la e agai mai lava latou polokalame, leaga o Tiavea e tele le galuega e tatau ona fai ai. O lae ua uma ona fai le temporary foi lea e feoai ai taavale, ae moomia se auala laupapa mautu mo le feagai ai. Ou te iloa o lea ua vavala ata o Taulelei mo se taimi lata mai e faatino ai tulaga ia.

O le tulaga lea i poumoli, aua o moli o lea e pepe, e i ai faaletonu. O le mea lena o lea e talosaga mai, ae le malamalama o le afaigaluega, o lea foi e tau faasoasoa le taimi o le afaigaluega aua e le mafai ona o atu i le po, a o le tasi lea tiute o tatou pulenuu i le pou, ona tusi lea i lalo ia mafai ona o atu le afaigaluega i le ao ona fai lea i le taimi avanoa ona fai ai lea o se sailililiga ma mautinoa ua tatau ona sui. O le galuega lava ia e tatau ona galulue faatasi, a o le aumai foi lea faapea ua pepe matou moli ae leai se galuega faatino, e faapena foi ona tuai ona vaavaai i ai le Matagaluega, a o galuega e tatau ona galulue faatasi ai ma manino ai, o le tele lena o le taua, o le tele o talosaga ia e aumai i poumoli, ua faatino le galuega a pulenuu. O la e ua o vaai ma tusi mai le numera, o le pou lea o lo o i ai le street light ae pe, ona agai atu foi lea o le Faalapotopotoga e vaai ma siaki. Ae pei o le faafaigofie lena o le galuega, ona agai sao lava lea i ai, ae o le mataupu lava o lo o agai i ai le tatou Faalapotopotoga ma le Pulega ina ia faaleleia. Ma le faaaloalo lava.

**FOFOGA FETALAI:** Malo faafetai. E manatu ua manino ia vaega lau Afioga i le sui usufono mamalu ae agai i nisi mataupu o lea ua malamalama le saunoa atu a le afioga i le Minisita.

**Tofa FAGAAIVALU KENRICK SAMU:** Faafetai tele lava i lau Afioga i le Minisita mo le faamalalamalama. Ona ou oo mai lea i le tatou Faalapotopotoga o Vaa, faafetai lava mo le auaunaga, e le gata foi i Apia, a o Salelologa atoa ai ma Mulifanua. E leai na o le tatalo lava, o lea ua le toe faia le malaga lea agai atu i Satitua i Tutuila, pe le mafai ona malolo ma fai. E i ai nisi e fia malaga atu i le faaiuga o lenei tausaga ina ia faapena pea ona faaogaina le tatou uafu lea i Satitua.

Ia lau Afioga i le Minisita mo le Soifua Maloloina, e momoli tele atu le faafetai i le auaunaga e le gata i le falemai i Lalomanu, aemaise foi i Apia nei i le falemai i Motootua. A o le talosaga i lau Afioga, o le a se tofa a o sina masini faamamatoto foi mo lenei itumalo. Ua amata lava ona faatupulaia le gasegase o le faamamatoto i lenei itumalo, ae o le a se taimi i le lumanai ona

maua lea o sina masini faapea foi mo lenei itumalo, a tasi lava pe lua, a ua talafeagai foi mo i latou o lo o aafia ma le taumamao mai o Apia.

Lau Afioga i le Minisita mo Leoleo, faafetai...

**FOFOGA FETALAI:** Se i tulai mai le Minisita mo le Soifua Maloloina.

**Afioga Hon Tuitama Talalelei Tuitama:** Lau Afioga i le Fofoga Fetalai, ona o le talosaga a le sui usufono lea ou te fia faafesili atu ai, pe toafia nisi o lo o faamama le toto i Aleipata e fuafua agai i ai pe lava i le masini e tasi pe avatu ni masini se lima po o se mea faapena.

**Tofa FAGAAIVALU KENRICK SAMU:** Faafetai lava i le Minisita mo le Soifua Maloloina, pe a ma le lata i le toasefulu i latou o lo o maua ai i lea gasegase.

Lau Afioga i le Minisita mo Leoleo ma Falepuipui, e momoli atu foi le faamalo i lau Afioga e le gata i le auunaga i le saogalemu o le tatou atunuu i luga o aualatetele, aemaise foi o soligatulafono i totonu o aiga, faafetai lava i le auunaga, ae le gata i lea, o lenei vaitau i le ua aveva ma Komesina o Leoleo, faamalo. E vaai lava ma le totoa i nisi foi o taimi, o le Tulafono lava o le Tulafono, ae talitonu o le Tulafono o lo o afifi e le agaifanau ma tu ma aga a le tatou atunuu o le faaloalo, ae se i silasila totoa i vaega nei.

E tatalo atu ma le faaloalo i lau Afioga i le Minisita mo Leoleo ma Falepuipui, se i e alofagia le matou fale o le matou ofisa i Lalomanu, ua leva lava, o le taimi na tulai mai ai, o lenei ua fa tausaga, ou te tatalo atu i lau Afioga, se i e...

**FOFOGA FETALAI:** Se i malie lau Afioga o lea o le a tali atu le Afioga i le Minisita mo Leoleo ma Falepuipui.

**Afioga Hon Sala Fata Lisati Pinati (Minisita mo Leoleo ma Falepuipui):** Faafetai atu lava i lau Afioga i le Fofoga Fetalai ua sau foi le fia moe ia. Sa ou faapea ai e le taua e le sui usufono lea le mataupu lea i le pou. Silasila foi, o le Minisita Lagolago o le Matagaluega lenei. Sa ou faapea o maua lea e galulue faatasi e mulimuli lava i matou mea uma, ae peitai ane, o le lima lenei o tausaga o talosaga pea le uso. Ua uma ona ou fai atu o le a fai le fale tioata, ae fai nei ae le i uma le tausaga. E lelei le amata atu foi lea i le taimi o le a lata i le palota, atonu o le a alolofa ai le itumalo i si ou uso. Ma le faaloalo lava.

**FOFOGA FETALAI:** Malo. Faafetai le faamalosi. Tulai maia lau Afioga i le sui usufono mamalu e faaauau le saunoaga.

**Tofa FAGAAIVALU KENRICK SAMU:** Faafetai lava i lau Afioga i le Minisita. E leai, o upu lava a le atunuu e logo le tuli i le tata, e tu manu ae le tu logologo, ioe. Se i e alofa ane, e fa tausaga, e le lima tausaga, o le fa lenei o ou tausaga, e logologo atu ai le matou fale lea e i Lalomanu, ona o le fale e le o se fale...

**Afioga Hon Palusalua Faapo II:** Lau Afioga i le Fofoga Fetalai o se mea e fia faamalalalama. O le mea lea na umi ai tatou Fono, ona o le le galulue

faatasi o le Minisita ma le Minisita Lagolago, o lea na ou tulai muamua atu ai foi, ioe.

**FOFOGA FETALAI:** O lea ua ou maua lou finagalo.

**Afioga Hon Palusalue Faapo II:** O mataupu ia e tatau ona...o lona uiga e le feiloai lava le Afioga i le Minisita ma le Minisita Lagolago? O la e faafogafoga mai le atunuu i nei tofiga.

**FOFOGA FETALAI:** Ia faafogafoga mai o lea o le a ou faamalamalamaina atu. Malie lau Afioga i le Taitai o le Itu Agai, o lau lava lea maitau, ae silasila foi i lauga faalauaitete, e leai se mea e ufiufia, e aumai mama, e ui mai luma. E leai se mea e monomono i tua ni manao o ni Minisita Lagolago i Minisita aloaia. O le mea lena e tau o le faatamalii. O le tatou Tala o le Tupe, ia vaatele i tou finagalo, e leai lava ni mea e omiomi i tua o lo o faia, o lea foi na saunoa le Afioga i le Minisita mo le Soifua Maloloina, o lea foi ua talifuaitau le Minisita. O lea foi ua atugalua le Minisita mo Leoleo, o lea foi ua tali le Minisita mo Leoleo. O le mea lea, malie lau Afioga i le Taitai o le Itu Agai ou te manatu o lea lava e folasia i malae mea uma e tusa ai ma le faaauauina o galuega a Matagaluega taitasi.

**Afioga Hon Palusalue Faapo II:** Lau Afioga i le Fofoga Fetalai, ua logona Samoa i saunoaga a le Palemia, o le vaega lena e galulue faatasi Minisita ma Minisita Lagolago.

**FOFOGA FETALAI:** O lea ua maua lou finagalo. E galulue faatasi i mea ae afai loa tonu ma tulaga o mataupu...

**Afioga Hon Palusalue Faapo II:** Aua e te au i o i Minisita lagolago....

**FOFOGA FETALAI:** O lea o le a umi le tatou taimi o lou faalava soo. O lea e taumafai atu e faaalu le tatou Fonotaga. E leai se mea e tasi o fai i tua, o lea lava e.....ou te le o agai foi i se isi itu e punipuni le itu lea. Ae malilie sui usufono. Lau Afioga i le Taitai o le Itu Agai, this is our last year. O lea lava e tau faaoololomaau atu ma tau faagasolo le tatou Fonotaga. Alolofa mai. E le maua ai ni ai o le mea lena o le faalava soo o le Fofoga Fetalai na o ai aveesea. Tulai mai le sui usufono mo Aleipata Itupa i Luga faauma mai le saunoaga.

**Afioga FAGAAIVALU KENRICK SAMU:** Faafetai tele i lau Afioga. Ua uma ona ma talanoa ma le Afioga i le Minisita. O le tala i le taimi o ma galuega, “aua e te popole e fai le fale o le Ofisa o Leoleo i tua e lei uma le paeaiiga lena. Ona o la e faafogafoga mai lou itumalo, ou te faaleo le latou finagalo, aua le faaleleia o le matou ofisa i tua i Lalomanu. Ona ou faaiu lea i lau Afioga i le Minisita o Aoga, e le faaititia le faamalo ma le faafetai i lau Afioga ma le Pule Sili ma le mamalu o le Matagaluega, e tusa ai foi ma le suiga fou mo le siitia o le tomai faafaiaoga. Faamalo e le faigofie. O le tatalo a lena itumalo, a lava lau faasoa e ala i faiaoga, ia manatua atu si o matou kolisi o Aleipata, i ni faiaoga aua lava le faaleleia atili, aua le aotauina o alo ma fanau a lena itumalo. Lau Afioga i le Fofoga Fetalai, e momoli atu le

faafetai a lenei itumalo e tusa ai foi ma le avanoa, e avatu ai se manatu aua foi so matou sao i lenei foi Tala o le Tupe. Ma lou faaaloalo lava.

**FOFOGA FETALAI:** Malo faafetai i le sui mamalu o Aleipata Itupa i Luga. Ia onosai foi i faauilavea a sui mamalu leaga e taua lou finagalo ma ou lagona, o lea lava e tuusao mai i lumamea e ala i le..... E ui ina e galue i le Matagaluega, ae e te le o faaaogaina le lua vavalalata lea e fai ai ni mea mo oe. O lea lava e faafofoga le Maota o lea e te agai i le auala tonu e talosaga i luma Maota i le Afioga i le Minisita.

**Afioga Maualaivao Pat Ah Him:** Lau Afioga i le Fofoga Fetalai o se mea e fia faamalamalama.

**FOFOGA FETALAI:** Tulai mai le sui mamalu. E faamalamalama ia te ai?

**Afioga Maualaivao Pat Ah Him:** O le tulai mai lea o le Taitai o le Itu Agai. Faamalulu atu lau Afioga i le Fofoga Fetalai, sa ou faia se fautuaga lelei mo le aufaigaluega a le Soifua Maloloina. O lea foi ua silafia ma malamalama le Afioga i le Minisita e tusa ma sau faamalamalama, e faalatele ai le agaga sa ou taumafai atu ai. E ese lava le faaoloataua latou, e ala ona ou fai atu, e manino le faaoloataua o le tulai mai o le Taitai o le Itu Agai, ae e le leaga le mea lea e fai nei o le tu atu ma..... Ao faafofoga mai le aufaigaluega a le Soifua Maloloina, o lo o avatu se fautuaga tuualalo ma se faamalosiua. O lea e manino lava ae e leai se agaga faapena.

**FOFOGA FETALAI:** Aua ia le tee le uluga o lea foi ua ou talatalanoa i le Taitai o le Itu Agai

**Afioga Hon Palusalua Faapo II:** Leaga e matuia le tuaiga, faaoloataua. Lau Afioga i le Fofoga Fetalai, e ala ona umi a tatou Fonotaga, o le le galulue faatasi o Minisita lagolago ma Minista, ae e le o se faaoloataua. O la e faalogologo mai le atunuu..

**FOFOGA FETALAI:** O lea foi ua ou faamalamalama atua le auga o le faamoemoe. Ia taatia ai lea faapea. Lau Afioga, aua e te toe faalavelave i lauga a sui usufono. Tuu pea lauga a sui usufono o lo o lauga Minisita lagolago e agai Minsita. E manatu ua manino ma malamalama le mataupu. Ua avanoa le Maota mo se isi sui e fia saunoa. Lafo atu i lea itu o le Maota. Tulai mai le sui mo Faasaleleaga Nu 3. Saunoa maia e asuasua atu se vaimalu i lena itu o le Maota.

**Tofa TUILEUTU ALAVAA VOI (Faasaleleaga Nu.3):** E muamua lava ona momoli atu le faafetai i lau Afioga i le Fofoga Fetalai i lenei taeao na liugalua ua tatou toe maua i le agalelei o le Atua. E manatu o lenei aso ma lenei taeao, ua laga foi se manatu e ave le sao ia Manuvao, e le gata foi ao lenei itumalo aemaise o le tapuaiga mamalu a si ou itumalo aua le faamoemoe o le fonu a le atunuu. Ua uma ona papae saaga ua faapena foi ona papae tia i Ulupaga, ua sala Mulifata ua taoto fata ua tasi le faafitiga a Aleaga. O le Atua ma lona finagalo ua mafai ai ona tauaofia i le lagi e mama ma le soifua manuia, aemaise foi o taualumaga masani e pei ona taoto ai le

Laulau a Fono i lenei taeao aua le fono usu a Samoa. Ao lenei aso ou te tulai ma le agaga faaaloalo ou te avatu ai se agaga po o se sao foi o lenei itumalo. Ua pisi le galu ua sina foi le galu, ua iloa le nuu ua lelea foi le taulaumea, ua palasi foi le laumeavale ma le Fonotaga a le atunuu e pei ona valaauina ai e tusa ma le.....aua lo tatou sao e ala i si o tatou atunuu. O lenei itula ua ou tulai e muliai ona ou oo lea i si ou itumalo o Faasaleleaga Nu 3, ae ua ou manatu, ona o le Tala Faaopoopo ma le Tala Faatatau o le Tupe i le 2014 i le 2015, 2015 i le 2016 o lea ua i le Laulau a Fono ma ua taoto i paga le tulaga o lenei taeao, ma ua malamalama foi. Peitai la o le matou leo, e le mafai lava ona alofia pe tuua lo matou foi avatu i le paia i lau Afioga i le Palemia, faapea foi le paia i Minisita, le mamalu o Minisita lagolago faapea foi lenei itu, le susuga i le taitai, le sui taitai faapea foi lenei ituvai. Le paia o sui usufono uma o le atunuu, i outou paia ma outou sa, e le gafa taulimaina e so matou leo. Ou te manatu e avatu le agaga faamalo ma le agaga faafetai e tusa ai ma tualumaga ma le tauavagameaina o le atunuu e ala i upu fai. O lea foi ua molimau galuega lelei uma, ua matau foi e le o faataga.....aua foi tofi ma tiute aemaise o le tau atinaeina o si o tatou atunuu, i itu tino uma. O lenei la vaega o le taeao matou te faamalo atu ma avatu le agaga faafetai. E lei fausia Roma i se aso e tasi. O galuega foi o galuega e lelei e momoli e le matagi, o galuega aua e le faigofie lo outou gapatia ma le fatuatia aua le feagai ai, i soo se itu ma soo se vaega. E muamua ona ou faatulou atu foi i le paia o le atunuu nei pau so matou leo. E le toe faafuluina auma masani o le atunuu, galu fatioo ma ona peau oo i ou paaoloa ma ou auma masani o Samoa mai mauga tetele e oo lava i mauga iti. Amata mai i le Ao o le Malo sei oo lava i se aupito itiiti,..... i ona itulagi aua le tauaveina o le galuega a le Atua i fata faitaulaga e fia faapea foi le mamalu o le atunuu. E le toe oo foi la i ai se leo, aua pe oo pe le oo, e le ela ai se mataitusi, aua le paia o Samoa. Ao lenei aso, e lagona lava foi.....ae le mafai ona tuua le matou foi... e tusa ai ma galuega faatino. E manatu lava o lea ua lamalama faaiu taualuamaga o lenei tausaga, ae talitonu foi o lea ua momoli atu ma avatu se lagona e ala foi i lenei itumalo ma tulaga o lo o taoto ai ma tulaga foi o lo o i ai i lenei vaitau. E masalo e fua tutusa lava i tatou i le tou paia i sui usufono aua le mamalu o le atunuu, i mea o lo o moomia ma mea o lo o fia maua, ae le mafai aua le faasoa utiuti ma le faasoa le atoa. Aua o le mea moni, o le manao lava e manao, aua e muamua le manao i le onosai, e muamua foi le tuinanau i le loto fuatia ifo. E moomia le agaga e tuualalo atu ai e tusa foi o lenei itumalo, aua lava le atinaeina. E i ai mea ua uma ona faataoto ma ua tilofia foi tualumaga o lena taimi ua tuanai, i le la tausaga aua le tupe faatino aua galuega tetele. O lea matau pe a ou vaai i le lisi o le paketi o lena tausaga, o la lava e muamua si o matou afioaga i Saipipi, peitai o lea lava o lo o paopao, ao lea lava o le a uma le tausaga o lea e tilotilo mai le itumalo. E le gata foi i lea, e talosaga atu i lau Afioga i le Minisita o Galuega tetele, o lo o moomia lava i si o matou nuu nei o Faga, e tasi lava si mea na faamaite i le la tausaga po o le 2009, o le auala lena i Salimu ua malepe. O nai fuaiala ia o Siufaga, Luua, Sapini ma Malae o lo o moomia lava. Tatalo atu i lau Afioga i le Minisita, seu ane le manu ae tagai ane i le talosaga vaivai, e ui lava ua tautua upega lenei paeaiga, ae lagona lava.....ia alofagia le talosaga a si nei itumalo, e tusa ai ma fuafuaga e pei ona talosaga atu ai i le taimi ua mavae. E momoli atu le faafetai tele i lau Afioga i le Minisita o Soifua Maloloina o la ua ite le faila o la ua tulai, vaai pea i Tuasivi ma falemai, ia malo e le faigofie. O le agaga e avatu ai le agaga

faafetai. O le faatinoga e iloa ai foliga, o mea e fai e iloa ai le lagona. O le vaai molimau e avatu ai lava le faamalo ma le faafetai tele i ia foi galuega. O lea ua faaiu lenei.....o la ua galueaina i lenei vaitau, e momoli atu ai le agaga faafetai i lau Afioga i le Minisita aemaise o le Matagaluega, e faapea foi le taitaiga i lena ituvai aua lau Afioga i le Tama o le atunuu, faapea foi ia le aiga Minisita.

Ona ou oo mai lea i le....e i ai lava le faamoemoe e pei ona vaavaaia, ia ua leva ona taoto fuafuaga fai aua le silasila foi i le taulaga ua uma i Salelologa. Ia te au lava ia i lau vaai i le tele o aso ma taimi ou te i ai pea i le itumalo, ua uma ona pae ulufanua aemaise le vaavaai i le tele o le eleele ma le tulaga ua....e le ia te au foi ae ou te vaai ma ou....aisea ua le faamaopoopo uma ai aseta a lo tatou atunuu i totonu ma amata ona faa....aua o lau vaai, ia tulouna Aiga ma tamalii ua leva ona lisi ai, pei o mea la o lo o vaai i ai, o mea leaga sa tau sue ma tau saili ni fale ma ni....o lo o i ai Matagaluega o lo o tu ma salalau i totonu, peitai o la e malamalama taualumaga, ia ona sa tau saili peitai o lena vaitaimi ua tuanai, o lea ua taoto mai fanua tele pei ona maau i ai le Faigamalo ma pulega lelei aua ia le motu tele i Salafai, ua tele mea ua tilotilo o la e i ai le NPF i le isi mea, o la e i ai....O le taimi lenei e ao ona fai fai malie ina ia ogatasi ia le gasologa e le gata ia faafaigofie, ia o le isi itu e aoga ma o tatou foi e le tutusa tauau i aiga vaivai, aua o le mea moni afai e i ai sau mataupu i o i le mea sa muamua toai i ai Matagaluega i fale o aiga po o tamalii o le o lo o lisiina ai, e ao lava foi ona e toe oso i le taavale ae toe sau i le maketi, ioe, faafetai e ui lava ina soata ma....ae o le agaga lena. Na ou vaai i le fale lau Afioga i le Minisita mo Tina ma Tamaitai, Atinae o Nuu ma Afioga ma Agafesootai, e leai o oe lava o le Tumua, silasila i le fale o Pulenuu, e le gata ina utiuti e pei lava ona talanoa....o lea ua avanoa le tatou fanua tele lea ua filifilia ma fuafua aua le toaiga uma o mea uma. E le matagofie i le fale lea, ua gau a o le maota le la o le maota lena e lua i ai le maota lenei, tatou foi i upu o le la itulagi, o le maota maualuga ma le maota, o i o le fatu lea, fatu o le atunuu le tofa ma le faautaga, o le maota o sui o nuu, o pulenuu, e le o se mea fou, o lo o i ai tamalii ma failauga, o tupu ma tamalii, o i o lo o lipoi ai faufauga aua Samoa mo le lumanai. Ae paga ua leva lava ona ou vaai, ia e le o se mea matagofie le vaai pea i tafaala, ua matua leaga faia. O le mea lea, ia e le o ia i matou ae lafo atu, aua o lo o i ai le gagana o lo o tupu ma iuleo foi lea i tua, e tele tupe a le Malo, ae se i vaaia i le la, leaga e usu ae talanoa e pei o upu i le vai ma usuga, e faapena tala a le atunuu, ae leai o le tatou maota, Maota o Pulenuu e lipoi ai upu o Samoa, e atinae ai, tatala ai le tofa, e sasaa ai le fafao aua se manuia lautele aemaise o Faigamalo ma atunuu e pei o le tatou atunuu. O le mea lea e avatu lava le agaga i le Afioga i le Minisita, ua matagofie le tele o mea uma, paga lea, ona o le tofi pulenuu o le tofi e aupito sili ona taua aua le feagai ai o le atunuu ma ona upufai. E faapena foi e ao ona fai se faletele se conference se venue se mea e fai e faatino uma ai fuafuaga, aua e manatu e talaleu faapena pe a afio atu tala atu le malo, e a lea fanua tele ua taoto nei, fai se....taoto ai fuafuaga ma toai ai mea uma, aua se manuia e le gata ia e le na o Savaii, o Savaii lava o Upolu lava o le tatou atunuu, aemaise ia omai i lau Afioga foi le Minisita mo Galuega, Felauaiga ma Atinae Eseeese, e leai e matagofie Mulifanua o le matua matagofie o galuega o lo o fai nei ua pei lava o le malae vaalele ua vaai ua paka ma faasino e tutu ai taavale ua saogalemu le gasologa o femalagaiga ma tulaga....e pau lea o se mea ou te vaaia pea pei ona ou



talanoa atu, o Salelologa i le mea o lo o aga i ai le queue lea o taavale, e faafeagai ma le mea e omai ai taavale, ona e i ai le mea na tupu i le isi na ou tu ai foi i ina, na taia e le taavale lea e aga mai i lona itu sao aua e afa lelei ia le itu ala lea, e aia i le laina lea ona e opposite e faafeagai o le itu sao ia o lea e i ai le laina e faasolo mai ai sa mo le vaa, ua matua.....na ona lafo atu i le lagona, e aveese le pa atoa lava lea fai le pa sima atoa le taavale i le itu lea, na aafia ai le isi loomatua na taia le taavale i le faitotoa, ua laki ona o le tatou.....

**FOFOGA FETALAI:** Malie le sui usufono, se i tulai atu le Afioga i le Minisita mo Galuega, Felauaiga ma Atinae Eseeese, tulai mai le Afioga i le Minisita.

**Afioga Hon Manualesagalala Mati Tuigamala Enokati Posala:** Lau Afioga i le Fofoga Fetalai, faafetai i le mataupu ua laga i o tatou uafu ia i Mulifanua ma Salelologa, e moni o la ua tulaga lelei Mulifanua, ia o lea ua oo le fuafuaga i Salelologa, peitai, e i ai faafitauli la e tulai mai i luga i fanua ia, o nai faafitauli na ua tau tuai ai ona faatino ia galuega o lo o faataatia ma o lo o galulue faatasi ai ma le Matagaluega o Punaoa ma le Siosiomaga, ia se i tau foia faafitauli nei, ae o le ala lena ua tuai ai ona faagaoioi le tatou uafu i Salelologa, ona o le mataupu la e tulai mai ai ae ua alu lava le polokalame a le Faalapotopotoga o Vaa o lo o vaaia uafu ia mo le faaleleia aemaise le mamalu o lo o ave lava le faamuamua i tatou uafu ia i femalagaiga mai Savaii i Upolu, ona o mea o lo o tulai mai ai i luga o fanua ia i luga i le uafu lea i Salelologa, ae atonu o la ua faasalalau na ou maua ua faasalalau le isi vaega i le itu lea i Sisifo, o la o le a faagaoioi galuega i ina, a o le itu i Sasae pei o i ina lea e tulai mai ai o lea e i ai ia kiu ia o taavale, a o le fuafuaga la e i ai e pei lava o le fuafuaga i Mulifanua, e le toe tutu ni taavale i fafo i luga o le auala, ae o le a tuu uma i totonu aua le saogalemu, ae talosia ia foia faafitauli ia ae tulai mai i se tulaga lelei le tatou uafu i Salelologa, ma lou faaaloalo.

**FOFOGA FETALAI:** Malo faafetai. Ia tulai mai le sui usufono e faaauau le saunoaga, le sui usufono mo Faasaleleaga Nu. 3.

**Tofa TUILEUTU ALAVAA VOI:** Faafetai i lau Afioga i le Minisita, leai o le tauologologo lava e tupu ai, ae sao lelei e le faapea o ela foi le fuafuaga a lau Afioga faapea foi le Matagaluega, a o mea ia o lo o vaaia pea i aso uma ma taimi e aafia ai, aemaise lava o le faagasologa o femalagaiga ma le puipuiga o i tatou aemaise o tagata lautele.

O le Afioga i le Minisita mo Faatoaga ma Faigafaiva, o le atinaeina o le atunuu e le fou a o le vaai pea i ai, o le lagona e moomia lava o tatou taumafaiga o laufanua ma le lauuta po o le avagato, o lau mau a le faaponesia aemaise lava le popo ma le koko, o mea sa fai i le 1999 i le taimi o le afa po o tua atu lea sa fai ai le galuega lea o le ponesi lea sa \$2.00 i le koko, \$2.00 i le niu, e pei o le pusa...o mea na o lo o manuia ai nei le tele o afioaga, o lo o tele galuega ia i le faatinoga foi o lena.....ua leai lava ma se isi i lena vaitau sa saili, ona pau foi lea o le auala e vaai i ai, e ui lava i le kofe o a nisi mea e aumai i fafo, a o le fatu lava lea a le atunuu, o le niu – a faapea o le a le talosaga ia e leai e avatu lava. E pau lava lea o le mea e ao ona toe faa....aua le faamoemoe o le atunuu, aemaise lava o le galueaiina o le niu ma le koko, e

ui lava sa uu tupe ai nisi ae sa tofu aiga sa taufai.....ia avatu i tafatafa o lau Afioga i le Minisita le talosaga aua foi lea fuafuaga aemaise o le Ofisa o Faatoaga o le fatuaiga lea aua lo tatou atunuu, aemaise o le fofoga taumafa ma atinae eseese.

O Savaii foi lau Afioga i le Minisita mo Tagata Asiasi Maimoa mai, e le na ma le laina, e manaomia lava ni nai fesoasoani, o le nuu nei foi o le nuu matagofie aemaise lava si o matou nuu i Faga, i Tuasivi seia paia le la ituvai, o lo o moomia lava ni nai fuafuaga, o le tele foi o e asiasi maimoa mai e momoo lava e matagofie, e manaia, ia ae talosaga pea a i ai ni nai fesoasoani, aua o lo o fai lava le tapu ma fuafuaga e oo lava i le gataifale ma le aafia o gataifale i galuega, ia ua tapu i tulaga e pei ona i ai le lauina o le oneone, o le faamamaina o aai, aua ou te iloa tasi lea pona malosi o le atunuu, o lea e mautinoa o tatou tagata asiasi maimoa mai. O le mea lea e na ona lafo atu i lau Afioga i le Minisita faapea foi le galuega faasolo aua lava se manuia o le tatou atunuu.

E talitonu o lea ua uma ona faataoto mai i le Tala o le Tupe e le tele foi so matou sao, pau lava lea o le mea o le matou talosaga atu e tusa o fuafuaga i lau Afioga i le Minisita e fitoitonu i ai le talosaga a lenei nuu o lenei itumalo, o auala galue aua le atinaeina o le atunuu. E fua le manao i seleni ua maua, ia e le auese, o se lagona lea faa.....o se lagona moni lava lea, ou te iloa e au faa.....o se lagona moni lava lea, ou te iloa e au ia ae le mafai foi ona.....e le mafai lava ona malu ai pea le sami, e le mafai ona tuua mea e tulai ma tuputupu mea e aliai e aafia ai le atunuu, ona valaau lea i fesoasoani pei o le.....ae a fua, e fua le seleni i lo tatou malosi pe a fua faapena. O le Tala o le Tupe e le toe i ai se taofi, ae ese le matagofie o le faaupuga, aua tatou te manao tele pe afai ua lava ma totoe i le taimi ma lona tulai mai. E i ai le agaga faafetai, e leai foi se isi e toe.... i tulaga o le Tala o le Tupe ua fofola nei i le Maota, e faafetai, o le agaga foi lea. A i ai lava le tulaga, e le mafai ona tuua le mea e oo i ai pe a oo ina tulai mai fita ma faigata o fita foi ma puapuaga, e iloa ai le tagata atamai. O le mea moni lea lau tala, a oo mai mea tutupu e aafia ai le taitaiga o le atunuu, tatou te aloese i tulaga e pei ona augani i ai le soifuaga pe a oo ina tulai mai faalavelave ma puapuaga ma faigata, o i ina o lo o i ai le uta a le poto, o ina foi e iloa ai le tautai. A o le fua o le manao i le seleni ua maua, faafetai foi. A mea ua tatou aeae le mea ua maua. E sili si manu ua maua i lo manu e tele.

O lea i lenei aso, o lea foi ua talanoa atu le sui usufono o lenei itumalo, lou itumalo, ua outou faafofoga le Taulagi, mai Saasaai seia paia Siufaga ma Faga, o lea ua lamalama faaiu o lea ua sina le galu ua tatou tulata i le faaiuga foi o lenei Paeauga. E leai e le fuatasi i se tasi, o le tofi ma le nofoa o la outou afioga i tapinga aua o oe o le Taulagi.

Le tatou itumalo, le paia foi i le la ituvai aua le afio o Tofa aemaise o le Aiga Sa Tofa, lo outou Maopu ia Sua, e faapea foi Taatiti ma Tatau i lea itu o le vai i le afio o Vaafusu ma le Suafa faapea ma Aiga, Vaelua ma Segi o le Matua Fetalai o oe le Pule a Leuu, faamalo le tapuai. So o se tautai lava e sii se vaa, e le faapea o lea maua ia, ae tau lava o sina... ae Faga, le afio o Toafa ma le Tagata o le Aava , le mamalu ia Salemuliaga i ona itu e fia ma le Taulagi lena, e avatu ai le faafetai tele aemaise foi le agaga o le faamalo, leai e le mafai ona atoa so outou taumafaiga vaivai faapea foi ona mafai e la outou auauna pei ona filifilia, leaga o le tofi o la outou afioga ma le nuu ma le itumalo. Ae faafetai atu i le agaga faafetai ma le agaga tapuai i lo outou

falasee ma lo outou fala fofola i lena talaga aua le Afioga i le Faasisina, Toleafoa ma Vaafusuaga, aemaise o la outou lauga aua Salemuliaga ma le Matua Fetalai ma le tatou itumalo. Ia susu foi le aufaigaluega paia a le Atua i lau Susuga Kaleve Leifi faapea foi ituaiga e fia i Tama o le Ekalesia, e le sua se lolo i se popo, e le i fausia foi Roma i se aso. Afai e lagona le taua o nei mea, ia tatou viia le Atua, e a nei, e a taeao, e tapuaia le alofaiva o le atunuu, toe itula o totoe ma toe taimi o totoe o lenei tausaga, ia taitai pea i le soifua maua ma le lagimama ia maua lenei tausaga faaiu i le manuia la outou tapuaiga, i le alofa o lo tatou Matai.

O lo matou leo lea ma le agaga faaaloalo. Ia ona pau foi lea o lagona o lenei itumalo e tuuina atu i le laulau, ia alofagia e le Atua le atunuu i lau Afioga i le Fofoga Fetalai, faapea foi le Afigoa i le Palemai ma lena Itu vai, a outou Afioga i Minisita faapea foi lenei itu i le Taitai ma lenei Itu ma sui usufono mamalu uma o Samoa. Alofagia e le Atua ia maua pea lenei tausaga i le filemu ia saunia tatou, aua tatou te fefefe aua e tupu pea feeseeseaiga ma femisaaiga ma feluitauina, a o i ina o lo o fai mai Iesu e faaalua ai le faamaoni o i tatou. Manuia le tatou Fono.

**FOFOGA FETALAI:** Malo faafetai saunoa i lau Afioga i le sui usufono mamalu, ia, o le paia lava lea aua le paia o le itumalo ia Faasaleleaga Nu.3. Ia, Tuileutu, ua logoitino matagi lelei i lenei aso, faafetai lauga faalaeiau ua lagona le malosi o le tino ae tatou le i alo i le faiga malologa. o lea faafetai atu i le sui usufono saunoa, malo timai faafetai lauga i le tatou Tala o le Tupe.

Ia, ua tatou taunuu i le tatou taimi malolo, ua manatu foi ua vela le fala, o le a tatou alo i le tatou malologa masani o le aoauli ona tatou toe taliu mai lea e faaauau le tatou Fono. E faasilasila atu o lea faataatiaese Tualumaga a le Fono Aoao mo lana malologa mo lenei aoauli.

*Na faataatiaese Tualumaga a le Fono Aoao mo lana malologa masani i le itula 4:45 i le aoauli ma toe amatalia i le 5:20 i le afiafi.*

*Na toe faaauau felafolafogaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.2) 2014/2015 & Tulafono Tau Faaofi o le Faatatauina o Tupe 2015/2016.*

**FOFOGA FETALAI:** Ia, faamalo atu le onosai i lenei vaega o le tatou Fonotaga i lenei itula o le afiafi. E manatu o lea ua tatou taunuu i le vaega mulimuli o le tatou Fonotaga, ma e momoli atu le agaga faafetai, malo le usufono malo foi le tauatai. E i ai lava le talitonuga e leai lava se vaa e le taunuu i le tini, ae tatalo atu lava ma le agaga maualalo i le paia ma le mamalu o le tatou Palemene, ona o le faaaogaina o tatou avanoa ma taimi. O lea lava ua augani le tatou Malo mo le faaopoopoina o tatou itula Fono ma le faanaunautaiga, ona o le tulaga o tuleiga ma saunoaga e fia tuuina mai i le tatou Tala o le Tupe. E avatu ai pea le fautuaga a le Nofoa i le paia ma le mamalu o sui usufono e le i saunoa, ia o lo outou avanoa lenei. O lea foi ua faliu le la i lona tauafiafi, o le taimi foi lenei o lea ua maua le avanoa e faafofoga mai ai itumalo, ae alo maia le paia ma le mamalu o sui usufono e le

i sausaunoo o lea e lava le tatou taimi masalo e lava a se toafa po o se toalima i le tatou itula o totoe.

Ia, tulai mai lau Afioga Lenatai Victor Faafoi Tamapua, o se tasi o sui usufono mo le Vaimauga Sisifo, ua avanoa le Laulau a Fono mo le saunoaga.

**Tofa LENATAI VICTOR FAAFOI TAMAPUA (Vaimauga Sisifo):**

Malo faafetai i lau Afioga i le Fofoga Fetalai, faafetai foi mo le avanoa. Avea foi lenei avanoa e faatalofa atu ai foi i lau Afioga tainane foi le Afioga i le Palemia ma le Sui Palemia ma le mamalu o le Kapeneta, o sui usufono foi po o Minisita Lagolago tainane foi le Taitai o le Itu Agai ma le la Itu o le Maota.

E faatalofa atu foi i Ofisa Sili o Pulega ma Pule Sili o Matagaluega ma Faalapotopotoga ua mafai ona tatou faatasi i lenei itula afiafi.

Lau Afioga i le Fofoga Fetalai, e fia faamauina foi se faafetai faapitoa mo le itumalo pele o Vaimauga Sisifo i le afio o Alosina, lau Afioga Seumanutafa, lau Afioga Toomalatai, afifio le aiga paia o Salevalasi lau Afioga Tamaseu ma lau Afioga Faualo. Susu oulua Matua, afifio Faumuina ma Siligatusa, susu le Matua o Leupolu ma Alo o Malietoa, alaatai le faletolu ma Vainalepa ma upu ia te oe Tuisamau. A liua le vai o Sina ma Fuaiupolu i le afio o le Matua ia Tofaeono, afifio Asi ma Patu, afifio Aiga e tolu, afifio le Usoalii ia Luafau, Tuiono ma Lupetaliaami, alaatai i laua na tai, Tamapua ma Manogiamanu ma le mamalu i le nofo a ituaiga ia Fuata. Malo faafetai, malo le tapuai, malo le lagalaga, e avea ai foi lenei tagata faatauvaa ma se tasi o sui usufono o le tatou itumalo.

Lau Afioga i le Fofoga Fetalai, masalo o lenei afiafi o le afiafi e momoli atu ai le agaga faafetai. O lea e fia momoli atu ai le agaga faafetai i le Afioga i le Minisita mo Galuega, faafetai i lau Afioga i le Minisita e tusa ai foi ma le auala i Moataauta agai i Magiagi lea sa tatala i le vaiaso ua tea. Ia, ae pei ona tatou auai faatasi foi ma alii ma faipule o le afioaga, sa i ai foi se tatalo na tuuina atu i lau Afioga ona o lea ua tauaao foi e lau Afioga le talosaga tusitusia aua foi ni moli o lea auala aua foi le faafaigofieina o le feoaiga a nisi aemaise foi tagata o lo o afifio ma papaaao i lea vaega o le nuu. E talitonu foi o lenei ua tauaao e lau Afioga se talosaga tusitusia foi i se auala e agai lea i le faatanoa lea e i i i Magiagi, e sosoo atu lava ma le auala lea sa tatala i le vaiaso ua tea aemaise lau Afioga le auala lea i Faatoia, lea sa avatu le talosaga sa matou savalia i lou ofisa i le 2012 ma nisi sa afifio foi i lea vaega, o lea sa maua mai le tali, ae paga lea ua toe aafia lo tatou atunuu i le lologa o Evani, atonu o i ina lea sa toe alu ai foi nisi o seleni a le tatou Malo ae talitonu o lenei taimi, po o le a se finagalo ae se i oo mai foi le tufa i lenei vaega o si o matou itumalo.

E fia faalua foi le faafetai i le Afioga i le Minisita mo Punaoa Faanatura, faafetai i lau Afioga e tusa ai ma le galuega ua amata i le taligalu lea i Vaiala ma Vaipuna. Ia, lau Afioga i le Fofoga Fetalai, o lea galuega sa tatalo ai foi nisi o sui usufono sa faapea ona avea ma sui usufono i Paeaiga ua tuanai, a o lea sa tulimatai e maua ma le Tofa ia Lefau i lenei Paeaiga, ae o lea ua mafai ona faatino i lenei taimi o le Paeaiga.

Faafetai foi i lau Afioga e tusa ai foi ma le tatalaina ma le toe faaleleia o le taulaga lea sa faaleagaina e Evani, o le toe faaleleia lea pei ona saunoa ai foi nisi i le tulaga lea o Vaisigano i le vaega lea o le river pool e agai atu i Lelata seia oo atu i Ueligitone i Magiagi. E fia faalia foi le faafetai ona o fuafuaga faataatia o lea polokalame o le a faapea ona faia ai se auala taavale e agai i

Ueligitone. Ia o Ueligitone ua leva ona taatia le talosaga ona o le toatele o tagata o lo o faapena ona nofoia lea vaega o Magiagi, ae faafetai i lau Afioga ona o lea ua faataatia lea fuafuaga mo se auala mo si vaega lea.

Ae pau lava le tatalo lau Afioga i le Minisita ona o lea e maitau atu o le auala e agai atu i Lelata i fanua ia e tau o fanua o nisi i Apia po o le Afioga foi i se tasi o poutu foi o le afioaga o Apia ia Tuiletufuga, ne i i ai se taimi e agai atu ai le matou afioaga i Magiagi ae o atu ua tapuni e le toeaina le auala i le vaeluapo a o lo o manaomia. Pe mafai ona toe tilotilo pe mafai ona fai se isi auala i uta atu i le vaega tonu lea e i ai le falesa Mamona i Magiagi, ae taatia atu lava i ou autafa. E faafetai foi i le polokalame lea, ona o lalo foi o lea polokalame sa avatu ai foi se talosaga ae o lea ua faaoo mai o le a faatino ai foi se auala savali i totonu o Moataa i le vaega tonu lea o lo o i ai le togatogo. O lea e momoli atu ai le agaga faafetai, ma le tatalo, talosia ia fai e le i uma lenei tausaga. Ma le faaaloalo lava.

Lau Afioga i le Fofoga Fetalai, e fia faaleo foi ma faamau le faamalo ma le faafetai i le Minisita mo Faatoaga ma Faigafaiva, o lou Minisita foi lea, malo le finau, malo le faaeaea i si tatou atunuu i le aveia lea o lau Afioga ma Taitaifono o le fonotaga tele lea sa faia i Roma i le amataga o lenei masina. Ia, e lata i le 200 atunuu lea sa auai ai, ae le gata i lea, e momoli atu foi le agaga faafetai ona o faailoga taualoa lea sa tauaao e Samoa mo galuega lelei ua mafai ai ona faatino. Malo faafetai.

Lau Afioga i le Minisita mo Faamasinoga ma Faiga Palota, e avatu ai foi se tuualalo ona o lenei vaitau e fai lava si faigata foi o le taumafai e resitala sui o tagata e fia palota. E ala foi ona avatu se faamatalaga lau Afioga, ona o lo o uunaia e le tatou Matagaluega ina ia o atu lava le mamalu o le atunuu e faatino le latou resitala, ia aua ne i oo atu ni sui tauva e faatino le latou resitala. A o le mea ua tupu nei lau Afioga, e fai lava sina lavelave i nisi o vaega. Ua o atu nei, o le masina ua tea, e i ai nisi o le matou itumalo sa o atu e mananao lava e fai e latou le latou resitala, a o le mea ua tupu, ua o atu nei ma latou tusifolau faapea latou pepa fanau, ma le manatu o vaega ia o lo o moomia. E moni e fai lava si mamao o le tatou Ofisa i tai i Mulinuu, ae o atu i tai ae faapea mai, e manaomia foi se faamaoniga a le pulenuu. Ae atonu o se vaega taua foi lea, a o le tulaga i feoaiga, e faigata foi i tagata le omai ma aumai foi le tofi o le nuu e faatino ai foi lea faamoemoe. E uma ifo, ua toe vaai mai lava i le sui tauva mo se fesoasoani, a o vaega ia o lo o taumafai ia aua ne i oo ai le Ofisa o Faiga Palota ona o le tulaga e le o lilo foi i le silafaga a e o lo o faafofoga i totonu o lenei Maota.

E le gata i lea lau Afioga i le vaega lava lea o Faiga Palota, e toatele lava nisi o le matou itumalo o lo o faapena ona valaau pe oo atu foi i le fale ma faapea mai po o le a le sao o latou ona o le tulaga lea o le urban seat po o fea tonu o le a agai i ai latou, ona o nisi o latou ua ono Paeaiga o palota i Vaimauga Sisifo, a o le mea ua tupu nei, ua i ai foi nisi o fanau ua mafai ona resitala i le taimi lenei ae ua fai mai le Ofisa o Faiga Palota, a leai se vaega lea ua tau e latou o le Kinship i Moataa, Magiagi ma Vaiala i le vaega lea o Vaimauga Sisifo muamua lau Afioga, e le mafai ona palota faa-itumalo. A o se tuualalo lau Afioga, ona e i lalo o Vaimauga Sisifo Nu.1 la e sau ai Magiagi, Moataa, Vaivase, Faatoia, ma nuu uma ia pei ona i ai i le Tulafono. Ae faapena foi i lalo o le Tulafono, o lo o sau ai i lalo o tuaoi o le urban seat, nuu lava ia pei ona tolaulau mai ai. Ia o le tuualalo lau Afioga ma le tatalo atu ma le agaga maualalo, aisea e le tuu ai le filifiliga i le tagata palota pe palota i

le urban seat pe palota faa-itumalo. Ia, o se tuualalo lea e avatu i le Afioga i le Minisita mo Faamasinoga ma Faiga Palota.

Lau Afioga i le Fofoga Fetalai, e talitonu o lea ua faaiu se faamatalaga a lou tagata vaivai, a o le Tala o le Tupe, faafetai i le Afioga i le Minisita o Tupe ma le Matagaluega e tusa ai ma le tapenaga. Faafetai foi i le Taitaifono ma le Komiti o Tupe i le latou foi pitolaau ma le latou foi galuega.

Lau Afioga i le Fofoga Fetalai, faafetai mo le avanoa, ia alofagia e le Atua taualumaga o totoe o le tatou Fono, ia alofagia le itumalo pele o Vaimauga Sisifo, alofagia Samoa. Soifua.

**FOFOGA FETALAI:** Malo saunua i le sui usufono mamalu, o se tasi o sui usufono mo Vaimauga Sisifo, e manatu ua faafofoga ma le manino le Maota aemaise le tapuai mai a le tatou itumalo. Ia, o lo o avanoa pea le tatou Maota mo se tasi sui usufono e fia saunua.

Ia e manaia lava le faasolo mai loa o le tou faalau lena. Ia Tuisa, tulai maia le sui usufono mamalu mo Sagaga le Falefa.

**Tofa TUISA TASI PATEA (Sagaga le Falefa):** Faafetai atu i lau Afioga i le Fofoga Fetalai, atonu o lea ua moe i ulugalua le taumanu, ua tofa foi i malama le fetu taimalaga ina ua tafa ata o Utumou, ua fati manino foi auma o matematega, ua patogi le ulu mai Pualaga pei o le tala i le mati mai Saua a le Malietoa ma le Tuimania. E talitonu foi o lele ua malu le taufaanuu, ua lupepe foi le taumanuua ua tauvai sunui ao o le lagi i le paia ma le mamalu pau o le Maota nei, i lau Afioga i le Fofoga Fetalai o le Maota i le malae o le faautugatagi a Samoa.

Afio lau Afioga i le Palemia, Afioga i le Sui Palemia aemaise foi o Minisita o le Kapeneta ma lea talaga atoa i Minisita Lagolago. Afifio foi lena talaga atoa i le afio o lau Afioga i le Taitai o le Itu Agai ma lou Soatau le Itu Agai, aemaise foi o Minisita faaolioli ma sui usufono mamalu uma o le Maota. Ua tatou faatasi foi ma Ofisa Sili o Pulega ma Pule Sili o lo o vae ma lima i ai le tatou Malo. Ia e faapea foi ona ou faatulou i le tapuaiga a Lana Afioga Mamalu O Le Ao o le Malo le Afioga i le Tama a Aiga, Tui Atua ma lau Masiofo, aemaise foi o le Sui o le Fono a Sui Tofia, le Tama a Aiga le Tuiatua ma lau Masiofo, afio o le Faamasino Sili Faamasino Sili aemaise foi o le Peresetene o Fanua ma Suafa, ae a le paia ma le mamalu o le Faamasinoga mamalu a Samoa, e faapea foi ona ou faatalofa i le tapuaiga mau a Samoa o lo o tapuai mai i maota ma laoa i so o se alaafaga o lo o ula le mulila ma po le fala ma tui mai le mulipapaga aua le tapuaia o faiva o lana Palemene i tuua sinasina i tama ma tina matutua ua pulapula-lagoto lo latou soifua, a o lo o apomau le tofa ma le faautautaga mamao aua lava le tapuaiga o faiva-alofilima o sui usufono mamalu uma o le Maota nei, le pulega mamalu i alii ma faipule Aiga ma Tootoo le nuu o tamaitai, faletua ma tausi, o le malosi o le nuu o lo o faia le tautua le tautuaina o le vao ma le sami aua aiga, ekalesia ma nuu aemaise foi lo tatou atunuu, e faatalofa atu.

E faapena foi ona faatalofa atu i le Motu i sasae i le tapuaiga foi a le Kovana Sili ma le Lutena Kovana ma le Faigamalo, o paia lava ia aua Sua ma le Vaifanua, Fofa ma Aitulagi, Saole ma Saleaamua ma le Launiu na Saelua, Tama a le Manuatele ma Tootoo o le Faleula.

Ia e le mafai foi ona ou faagaloina si ou itumalo e pele ia te au, e ao foi ona ou faatalofa atu, malo le lagi e mama ma le soifua maua i nai ou pitonuu ia o

Aele, aemaise o nuu o Tafaigata e oo lava i Aleisa, e pei lava ona outou silafia le tulaga o le a i ai tatou i le tausaga fou, ia malo le tapuai.

E faatalofa atu foi i le paia i Fogaa ma maota e fia e i ai Vaialofa ma Paepaetuitui i Faleula, Utumoa aemaise Fogaa e afifio ai le Toetaufanua a le Malietoa, susu Alo o le Malietoa, afifio Maopu o le Tuiaana, ae alaalatai lau Fetalaiga le Tagatafou lau fetalaiga Laupa ma le Faletolu ma Tapunuu. E faapea foi ona ou faatalofa i lou nuu pele i Saleimoa mai Paepaemaligi seia paia Satomai le paia i le Fuafua ma le Fogava e susu ai Alo o le Malietoa ia Sapau ma Leiataatimu, afifio Sa Tilialo ae alaalatai le Gautaala ma le Faletolu, ua paia Falesoa e afifio ai le Toetaufanua e fia a le Malietoa, afifio Leusoalii aemaise o le nofo ia Maopu, alaalatai Lutua ma lau Gautaala ma le Faletolu. O le paia i Aveavai e afio ai le Faasausau le aiga Sa Tilialo, le Matua ia Toalepai, ae tausi vaatele oe le Gautaala. Ua paia foi le Niuvai ma Mataale e afifio ai le Toetaufanua a le Malietoa le aiga Sa Luatuanuu ma le latou Tama e i ai le Maopu afio le Aloalii ia te oe Matiu, le Usoaliitaufeagai ae pola puipui le Gautaala ma Siufanua. O paia uma na i Tititunoa i Lotosoa o le malae o Tupua ma le Laoai, o malae o Aiga e Tolu, ae afifio ai Alo o Sina, Patea ma Futialo ma le la tama le Mauputasi ia Nonumalo, e alaalatai ai le Aitutagata na faialaga i le Tuamasaga, aua Lutua ma lona Ailaoa le Gautaala ma le Faletolu, o paia na o lo tatou itumalo ou te faamemelo i ai, malo faafetai i la outou tapuaiga.

Faafetai tatalo, malo le onosai, o lea foi ua api le uli ua iite foi fanua a lalo ua toe nei o se aga, e le o toe mamao ona faaiu foi lea o lenei Paeaiiga, ae faamalo faafetai i la outou tapuaiga.

E le mafai ona faagaloina ia le aiga Sa Levi isi ou itumalo, Susuga i Faafeagaiga Taulagi i so o se ekalesia i so o se fata faitaulaga e fia o lo o faafalelemalu ma faatunapaulia aua lava le tauasuina o le Ipuvai o le Ola e nonomanu aua si o tatou itumalo, malo tatalo, faafetai i la outou tapuaiga.

Ona ou oo atu lea i le tatou Tala o le Tupe, o le matua o le aso, e fua le manao i seleni ua maua, live within your means, ese le matagofie o le matua o le aso, e avatu le faafetai tele i lau Afioga i le Minisita, aua foi le Tala o le Tupe i le faaiuga o lenei tausaga, e faaalua ai foi le lagolago a lenei sui usufono, e ese foi le manaia o le sini autu o lenei Tala o le Tupe, aua ou te talitonu, e aoga e le na o le Malo ae aoga i aiga, e aoga i nuu, e aoga i ekalesia, ina ia fua le manao i seleni e maua. Ia malo faafetai i lau Afioga i le Minisita, aemaise foi o le Matagaluega mo lenei foi Tala o le Tupe. E matau atu o lea ua agai lava i luga le tatou tamaoaga, ua agai atu i le \$2pilonia, ma e molimauina foi le tele o economic activities o lo o tutupu i totonu o le tatou atunuu, e tele lava nai pisinisi fou ae tele foi nai pisinisi a nai o tatou uso mai Saina, e tele nai fale fou ua faatutu ua faatupulaia le tele o pisinisi, ia ou te talitonu, o le mea lelei tele lea mo tatou, ia ae i ai lava nai tuualalo foi i le talitonuga vaivai a lenei foi sui usufono aemaise lau Afioga i le Minisita mo Tupe Maua, na o se tuualalo, e i ai le talitonuga e na o le lua lava nai vaega lea o le tatou Malo o lo o faia le galuega o le aoina o tatou seleni maua, na o le vaega o le Ofisa o Tiute ma le Ofisa o Lafoga. Ou te talitonu e pau lava ia, tulou le gagana, o povi tatau susu a le Malo o le atunuu lenei. e na o se tuualalo, pe le ua tatau ona tatou tagatagai ina ia mafai ona tuu eseese le lua lea ona o le talitonuga o lea ua agai i luga le tele o le tamaoaga ma le tele o pisinisi, ua tatau foi la ona concentrate lava le CEO ia i tai i le Ofisa o Tiute ia faaatiliina le lelei atili aua o lo o lelei lava le alu alu agai i luma le galuega,

ae manaomia ina ia toe faalelei atili ma soona lelei atili pei lava foi ona tatou molimauina, e ui lava ona o lo o faaopoopo tupe o lo o maua ma latou collections ae le o meet ina tagets, pei o le agaga lena, ae e ao foi ona concentrate ia se CEO fou mo le Ofisa o Lafoga ina ia mafai ona tilotilo totoa ia le tele o pisinisi o lo o i ai nei ina ia mafai ona faaleleia atili ia lafoga o lo o aoina mai le tele o pisinisi nei aua lava le tamaoaiga o le tatou atunuu, e talitonu o lo o lelei i le taimi nei, ae mafai ona faaleleia atili ina ia mafai ona sili atu ma lelei ona tele ni tupe maua i a tatou sources nei, ina ia faateleina ia tupe maua a lo tatou Malo aua lava a tatou paketi.

Ona ou oo mai lea i le Soifua Maloloina lau Afioga i le Minisita, e maitau atu e \$79miliona, ia e ave foi le faamuamua a lo tatou Malo ona e taua tele foi matafaioi, e avatu ai foi le faamalo tele ma le faafetai i lau Afioga i le Minisita aemaise foi le Pule sili o le tatou Matagaluega ma le aufaigaluega, malo tautua, pau lava le tuualalo foi ia ua manaia le tatou falemai, ae o lo o i ai lava ni nai delays laiti e manaomia le faalelei atili ina ia faaitiitia lea faafitauli o lo o i ai nei ona o le umi ona faatali nai tagata i totonu o le tatou falemai, ae malo le galulue. E maitau atu foi e feoloolo foi se vaega o lo o e \$6.1miliona ia mo le vaega lea Faamama Toto, ia ua talafeagai foi lea fuafuaga a le Malo ma ua manaia foi ona o lea ua faataatia ma lafoga mo faguinu suamalie le ava malosi ma le tapaa aua pei lava ona silafia e lo tatou atunuu, o le tele lava lea o le faafitauli o lo o i ai nei ma toatele ai i latou o lo o faamamaina o latou toto, ae malo faafetai.

Ona ou oo atu lea i le Matagaluega o Aoga, Taaloga ma Aganuu lau Afioga i le Minisita, e maitau atu foi le i ai o le seleni, ia o lo o ave foi i ai le faamuamua a lo tatou Malo ona ua pau o le faasoa, ae i ai lava ni nai tuualalo laiti, e maitau atu ia e le o mautinoa lelei po o i ai ia tatou Pre School i lalo o le lisi lenei, o le tatalo ia alofagia e ese le taua foi o Aoga Amata a le fanau, aua a lelei lava ona amata vasega i lalo o Aoga Amata ma le Primary School, ia ou te talitonu e oo mai foi i luga o kolisi, ua faafaigofie foi a latou taumafaiga.

E i ai foi ma tulaga o nisi o faasea e pei ona i ai le tele o faafitauli o lo o tulai mai totonu o Primary School i le va o le PTA ma faiaoga, le va o faiaoga ma le nuu, komiti, ia e i ai foi le tuualalo i lau Afioga i le Minisita ma lau Afioga i le Pule Sili, e pei lava sa ou maitau sa i ai ia Asiasi Aoga i ia ona aso ua tuanai, pe le o toe tatau ona i ai ia Asiasi Aoga, e talitonu o lo o faagasolo i luma polokalame ona o le suiga foi ua i ai nei, ae na o se tuualalo, o le aoga foi lea o le Asiasi Aoga e faigofie ai ona monitor galuega a faiaoga ina ia lelei atili a latou fuafuaga uma mo fanau laiti, e tele foi nai faafitauli o lo o tutupu mai totonu o matou aoga, ona o le va lea o.....

**Afioga Hon Magele Mauiliu:** Lau Afioga i le Fofoga Fetalai.....

**FOFOGA FETALAI:** Malie lau Afioga i le sui usufono mamalu, se i tulai mai le Afioga i le Minisita mo Aoga, Taaloga ma Aganuu, tulai mai lau Afioga i le Minisita.

**Afioga Hon Magele Mauiliu:** E faafetai i lau Afioga mo le avanoa ona o le mataupu lea sa laga foi i le fonu talu ai, o le mataupu lava lea i Asiasi Aoga, ae po o ua atoa nei le lua tausaga ua le toe i ai, peitai ia o le lua vaiaso talu ai



na fai ai le faaiuga a le Kapeneta o le a faapea ona toe aumai ia tatou Asiasi Aoga ia na leiloloa, o le faaaliga lea, ma le faaaloalo.

**FOFOGA FETALAI:** O lea ua manino le sui usufono, o lea o le a toe reinstate uma a tatou Asiasi Aoga.

**Tofa TUISA TASI PATEA:** Faafetai tele. Ia o le a ou le toe oo i lea tulaga, faafetai atu i lau Afioga i le Minisita. Ia o galuega e fia manaomia lau Afioga i le Minisita, ou te talitonu o lo o taatia le talosaga le matou malae lakapi a le matou aoga i Saleimoa le malae o Salepouae, e ese le taua o lea malae, ona o taaloga a alo ma fanau aoga a lenei nuu i Saleimoa, aemaise foi le Iuni Lakapi a Tuamasaga, o le mea lea e tatalo atu ai, e le tele lava se vaegatupe e faataunuina ai le faaleleia atili o lea malae, i lou ava ma le faaaloalo.

**FOFOGA FETALAI:** Malie le sui usufono se i toe tuu atu le avanoa, tulai mai Magele.

**Afioga Hon Magele Mauiliu:** Masalo a na alu le sui usufono i le vaiaso lea na tea nei e asiasi o la e ua amata ona oo atu i ai le galuega i le malae lea e taua e le sui usufono lea.

**FOFOGA FETALAI:** Faafetai. O lea ua saunoa le Minisita Tuisa.

**Tofa TUISA TASI PATEA:** Faafetai i lau Afioga i le Minisita mo Aoga, Taaloga ma Aganuu, pau lea o le Minisita e ese le talimano.

Ona ou oo atu lea i le Minisita mo Faatoaga, ia, e lagona foi le faagaetia, e momoli atu ai le faafetai tele i lau Afioga i le Minisita, faapea foi le Ofisa Sili o Pulega ma le Matagaluega mo le tauatiaeina o faatoaga ma faigafaiva i le tatou atunuu. E pei lava o le vao ma le sami e tua i ai le tatou atunuu i le tele o taimi. Ia, e avatu foi le faafetai tele e fonofaapipii foi e pei foi ona saunoa le sui usufono i ou autafa, ia, e ese le matagofie o le matou vaavaai atu i le tulai mai o lau Afioga e avea ma Taitaifono i le FAO, ua maua ai foi ma le tatou special award, aua o Samoa le isi atunuu e ese le lelei o le fruits o lo o i ai nei. E avatu ai le faafetai tele i lau Afioga i le Minisita mo galuega uma, e ese le manuia o Samoa ona o le vao ma le sami. Ua ala ona tatou matitiva o le tatou le o e galueaiina le fanua ma eleele. O lea ou te vaavaai atu o lo o soiso mai le Afioga i le Taitai o le Itu Agai. Ae i ai le isi mea na tupu nei ia te au i le taeao se i tau atu pea, na sau le isi ou atalii ua leva ona ma mafuta i aso ia ae te i ua tu atu ma le taga kukama ma tamato, ou fai atu, "Sole, o fea le mea o le a e alu i ai ma nei mea?" Ae fai mai, "Na ou sau e aumai mea ia e faaoga ma oe." Ou fai atu, "O fea e aumai ai?" Fai mai, "O lau faatoaga e \$200 lau tupe e maua i le aso." Fai mai e faatau fua o ana faaeleeleaga i le maketi. Ou fai atu, "Sole, e \$200, ua totogi sau NPF?" Ae fai mai, "Ma te o lava maua ma lou toalua totogi le ma NPF." Ou fai atu, "Oi, ae faapefea sau tax?" Ae fai mai, "E leai, o maua ma te o lava e moni e le o totogia ni ma tax ae i ai le ma GST la e totogi i le faleoloa la e faatau mai ai le ma fasimamoe la e ave i le matou aiga e fai ai le ma meaai. O le ma share la lena o le GST lena." Ou fai atu, "Sole, lelei la oe, ia fai la ma faalogologo mai i le Fono lea e fai mai le

aualii ia e te le o faigaluega a o lena e maua au tupe.” Ia, pei o le agaga lena, o lea la e faigaluega le sui lea.

**Afioga Hon Palusalue Faapo II:** Lau Afioga i le Fofoga Fetalai, o le mea e fia faasao.

**FOFOGA FETALAI:** Ia, ona o lea na e taua le suafa o le Taitai o le Itu Agai, se i tulai mai le Taitai o le Itu Agai.

**Afioga Hon Palusalue Faapo II:** E lua mea ua ou soisoi ai, o le mea muamua, e le oo i le itumalo na te le iloa ai le malae la e fai. Lua, o lea ua saunoa i si ona atalii lea na maua le kukama lea na sau aumai e fai ai sana mea e tatau ai. O lea la ou te toe faamanatu atu i le sui usufono, amuia lou atalii, a o si loomatua ma si toeaina la e leai se galuega, a o la e totogi lava le GST pe a o i le faleoloa.

**Tofa TUISA TASI PATEA:** Ia, ailoga e faigaluega si toeaina ma si loomatua i le faatoaga.

**FOFOGA FETALAI:** Malie Tuisa, se i tuu atu le avanoa i le faauilavea a Levaopolo.

**Tofa Levaopolo Talatonu:** Lau Afioga i le Fofoga Fetalai, pei o lea e manino mai i le saunoaga a le sui usufono e le tau totogia se tax a le aufaifaatoaga lea, o lea ua lava le GST lea e faatau mai le faleoloa lea. O lona uiga e te tetee i le tou Tulafono lea na aumai e tax uma ai le aufaifaatoaga?

**FOFOGA FETALAI:** Tulai mai le sui usufono.

**Tofa TUISA TASI PATEA:** E ese le manaia o le fesili, ae ou te tetee i le Tulafono leaga o lea e le i aumaia se Tulafono. O le a le Tulafono lea e te saunoa i ai? E pei lava e le i oo mai ea i le Maota? Se i oo mai la i le Maota ona ou tali atu foi lea i ai. Faafetai.

Ona ou oo mai lea i le Minisita mo Fefaatauaiga....

**Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi:** Lau Afioga i le Fofoga Fetalai, o le Tulafono a latou o la e fuafua mai.

**FOFOGA FETALAI:** Soia ia e te fai ma tau le Taitai o le Itu Agai ma le tu soo i luga. Faaiu mai le saunoaga a le sui usufono.

**Tofa TUISA TASI PATEA:** Faafetai atu i le Afioga i le Taitai o le Itu Agai aemaise foi lena Itu o le Maota.

Ona ou oo atu lea i le Minisita mo Fefaatauaiga, Pisinisi ma Alamanuia, faamalo faafetai, e le tele foi lava ni mea. Na pau lava le agaga ia o le agaga faafetai, malo le galulue i le tautuaina o le tatou atunuu e ala i le siakiina o pisinisi uma o lo o omai i totonu o le tatou atunuu ma tulaga uma faapena. Ae na pau lava le tuualalo, o le tatou o lea e maitau atu e 1,250, maimau e pe ana tele ni tatou tupe ae na pau o le mea ua maua, o lena ua i ai lena seleni e

fesoasoani i ai, ae o le talosaga ona o le toatele ia o alo ma fanau a le tatou atunuu ua uma aoga aemaise lava i le primary school. O nisi foi o tamaiti e uma loa i primary school ua le o i kolisi, o i latou foi ua maea kolisi, ia e uma loa lava ua leai ni galuega, o loa i le faifaatoaga. Ia na o loa lea e fai le galuega aua o lea o le a faigaluega i le faiga o le faatoaga lea pei ona ou taua i lau tala lea na fai atu anaeila. A o le toatele foi o i latou nei, e ese le lelei o latou aao, o aperiitisi lea e taua nei, ia na ona toe soso atu foi lea i le Afioga i le Minisita aemaise foi le Matagaluega, ina ia faafaigofie. O le faafitauli lea e tulai mai e pei e foliga mai e faafaigata i nai tamaiti nei ona maua ia latou mea ia o lo o i ai ma fai a latou aoga.

O se tuualalo ina ia faafaigofieina ina ia uunai tamaiti e omai e fai course nei faa-aperinitisi nei ina ia... aua o le latou lumanai, ae tele foi a tatou tradesman, o le manuia foi lena o atinae uma a le tatou atunuu.

Ona ou oo mai lea i le... E pei e foliga mai o le 70% o le tatou paketi lena ua faamoemoe mo le tatou STA, e ese foi le matagofie e molimauina e lou sui usufono le tele o galuega lelei a le tatou STA o lo o faaauau i ai, aua lava le taumafaiga o lea foi atinae i le aumaiga o tagata tafafao mai atunuu mamao ina ia faatinoina le toatele ma lelei atili ai le tatou tamaoiga, aua e le gata i faletalimalo a o associate services, aua e tele lava galuega a le tatou atunuu e maua ai ma faamanuina ai, ma faaopopo atili ai le tatou tamaoiga.

Ona ou oo mai lea i le Matagaluega o Leoleo, e muamua ona momoli atu lau faafetai tele i le Afioga i le Minisita, ae momoli foi lau faamalo ma lau faafetai i le Afioga i le Komesina fou o le tatou Matagaluega o Leoleo aemaise foi o le tele o suiga fou lea ua vaai i ai le tatou atunuu. E ese le manaia, malo faafetai. Malo faafetai le tautua, e leai lava se eseese o le Komesina lea ma le Afioga i le Ofisa Sili o Pulega o le Matagaluega o Aoga, ia, e faapena lava le olaga nei, a iloa loa lea mea ua tataua ona faafou ma faaleleia atili ona fai loa lea. Malo faafetai i la outou Matagaluega atoa, faafetai foi mo le lagolagoina o la outou Komesina fou.

Ona ou oo atu lea i le falepuipui, ia, faafetai atu foi i lau Afioga i le Komesina o Falepuipui o le tatou atunuu, e talitonu e le faigofie lau galuega, e le i fausiaina foi Roma i se aso se tasi, a o le tatalo, aua e te faavaivai, faamalosi. Ou te talitonu o le Atua e fesoasoani ia te oe aua se manuia o lea foi Matagaluega.

Ona ou oo atu lea i le Matagaluega aupito sili ona taua, o le Matagaluega o Galuega, tasi lenei Matagaluega e ese le alofa ia Tuisa. Lau Afioga i le Minisita, na pau lava lau tatalo na o galuega, a o galuega uma lava ua e faatinoina mo Samoa, malo faafetai i le tele o mea ua ou vaai iai mo le tatalaina o aualatetele ma auala laupapa, e oo lava i auala galue, malo faafetai. Na ona ou toe tatalo atu i lau Afioga i le Minisita ia e alofagia auala galue o si ou itumalo o Utumoa, o le auala lea e i le pito mai iinei o Faleula, o lo o i ai le Ekalesia Metotisi ae tutotonu ai le Ekalesia Assembly of God. O le toatele o nei tagata e savavali atu i i e tau i uta i Aele. O le aoga foi o lea auala e fesootei ai tai ma Aele. Ia, e talitonu o lena ua taatia i lau Afioga le talosaga foi a lenei itumalo a lenei foi nuu o Utumoa, se i alofa ane i ai. O le auala lea, o lo o i ai se faaletonu i luma tonu o le main road, e sharp lava le corner lea, faamolemole ma faamolemole, se i toe tagatagai ane i ai le LTA, ua aioi mai foi si loomatua o lo o afio i autafa i ina, o le afioga ia Seupule se i alofa ane le tatou Matagaluega se i tagai ane i ai, toeitiiti lava lavea ai, na o le tau lavea lava o taavale i le corner lena i le alu atu iinei i luma o Siaoisi

Palauni, tea le patupatu lena ona turn loa i o faasasao agai i o i le mea o lo o i ai le falesa Taiti, o ina tonu lava i le corner lena i le pioga lena e manaomia se tou tagatagai i ai ma se toe re-design ina ia aua ne i tulai mai ai se faafitauli ogaoga i le lumanai ona maumau ai lea o se soifua. I lou ava ma le faaaloalo.

Ona oo atu ai lea i auala o nai ou pitonuu i Saleimoa i Alamutu, o Nonoa, o Lotosoa, o Utualii, o Tufulele, o le tele ia o na auala e le i oo lava i ai se ta. E oo mai lava ia te au se lagona foi lea e avatu sau tuualalo, ou te le iloa pe talafeagai ae avatu pea. Ae a pe a taumafai le tatou Malo e fai se tatou, aua lava ne i tatou talitonu i faamatalaga ia e aumai aua ne i toe faia ni loans. Ae a pe a fai se tatou loan tele lava, ona tuufaatasi uma lava lea o auala galue uma lava o le atunuu, ia tofu lava le sui usufono ma ona auala galue o lo o manaomia le faatino, ona tatou aisi loa lea ia Saina e alofa mai, fesoasoani mai ia i tatou.

**FOFOGA FETALAI:** Malie le sui usufono o lo o saunoa se i tuu atu le avanoa i le faauilavea a le sui usufono mamalu mo Aana Alofi Nu.3.

**Afioga Toeolesulusulu Cedric Pose Salesa Schuster:** Lau Afioga i le Fofoga Fetalai, faafetai i lau Afioga mo le avanoa. O le fesili e fia malamalama ona e maitau atu i le saunoaga a le sui usufono o lo o taua ai le faia o se loan tele, ona e maitauina foi i nisi o faasalalauga foi ma faamaumauga ua le o mafai ona toe maua se avanoa e fai ai se tatou loan. Mo le silafia o mafai lava ona toe fai ni loan tetele a le tatou Malo ona o le tulaga o i ai nei le tatou tamaoaga pei foi ona i ai i le tatou Tala o le Tupe.

**FOFOGA FETALAI:** Tulai mai le sui usufono, toe lima ou minute.

**Tofa TUISA TASI PATEA:** E masalo e le o maua lelei mai e le sui usufono lea lau faamatalaga. Ua na o se tuualalo ae pule lava le Malo ia.

**Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi:** Lau Afioga i le Fofoga Fetalai.

**FOFOGA FETALAI:** Sei tulai mai le Afioga i le Palemia.

**Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi:** A manao lava le Malo e fai, e fai. E leai lava se mea e popole ai o la lava e malosi le tulaga o le totogi aitalafu. E ala ona taofiofi o tatou lava i le fuafua tatau. A manao lava le Malo e fai e fai lava.

**FOFOGA FETALAI:** Ua ou manatu ua talia lau tuualalo. Tulai mai le sui usufono.

**Tofa TUISA TASI PATEA:** E manaia la le tali a le Afioga i le Minisita. O lea la e faaeneene atu sau soso atu, ia e na ona ou tatalo atu la ma tuualalo e fai se tatou loan tele lava. Ona faatino ai lea o le tele o mau auala. Aua o le tele lava o nei mau auala e ala ai ona vevesi tatou. Ae a maea uma aualagalue nei, aua nei toe faia ni fale fou, ae na o se loan tele lava e faatino uma ai aualagalue nei, ona tatou alo loa lea e totogi.

**Afioga Hon Palusalue Faapo II:** Lau Afioga i le Fofoga Fetalai....

**FOFOGA FETALAI:** Tulai mai le Taitai o le Itu Agai.

**Afioga Hon Palusalue Faapo II:** O se mea e faamalamalama i le sui mamalu. O le mea lea e saunoa i ai le Afioga i le Palemia, e leai e le pule tatou o la ua fautua mai tatou e le World Bank ma le ILF e fai fuafua.

**Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi:** O lea e fai atu le tagata o lea e faafeagai ma le World Bank ae o lea e fai mai latou i tua e le o faafeagai. O le sao lena ou te fai atu ai.

**FOFOGA FETALAI:** Faamaea mai le saunoaga ua maea lou taimi.

**Tofa TUISA TASI PATEA:** Ou te le taliaina foi le fautuaga a le Taitai o le Itu Agai. O le a ou talia le fautuaga a le Afioga i le Minisita o lo o talanoa ma faletupe i fafo. Ia fai se tatou loan. O se taumafaiga lea. Alofagia e le Atua le Maota nei, lau Afioga i le Fofoga Fetalai aemaise talaga e lua o le Maota. Ia manuia tele aemaise Samoa ia filemu si o tatou atunuu. Ia maua le manuia. Soifua.

**FOFOGA FETALAI:** Malo le saunoa. Malo le faamanatu i le tatou Malo aemaise foi le faafofoga a lea itu o le Maota. Ae fai ma asiasi i le itumalo. O lea ua saunoa le Minisita o lea ua feoai kikapila i le tatou malae, ao lea e le o maua e taua. Ua avanoa le tatou Maota pe i ai se sui usufono e toe fia saunoa. O lea ua ou vaai atu ua folifoli mai le sui usufono mo Palauli. Tulai mai le sui mamalu o Falelatai ma Samatau.

**Afioga TAEFU LEMI:** Ia matamatanononofo pea ia le Maota o Tuiaana Tuimalealiifano, taoto foi faagalua e le fati ia paia o le Maota. O paia lava mai le vavau e oo i le faavavau. I le afio a lau Afioga i le Fofoga Fetalai ma le paia o le Palemene, afio lau Afioga i le Taitai o le Malo lau Afioga i le Palemia, lau Afioga i le Sui Palemia, Minisita o le Kapeneta, lau Afioga i le Taitai o le Itu Agai ma le Sui Taitai, ae a le lavalaoa o sui usufono mamalu o le Palemene o le Fono Aoao Faitulafono a Samoa. Talofa talofa lava.

E fia oo lau faatalofa i le tapuaiga a Samoa, i Lana Afioga Mamalu O Le Ao o le Malo ma lau Masiifo. Lau Afioga i le Sui o le Fono a Sui Tofia lau Afioga i le Tama a Aiga ma lau Masiifo, lau Afioga i le Faamasino Sili ma le Vasega o Faamasinoga, o Auauna tofoti a le Atua, o lo o nonomanu aua se manuia mo Samoa.

E faatalofa i le paia o Samoa o lo o taputapu mai i faiva o le Palemene, le paia aua Aiga ma Tama, Tama ma Aiga, le Usoga a Tumua ma Pule, Ituau ma Alataua, Aiga i le Tai ma le Vaa o Fonoti. O paia na o Samoa o lo o taputapu aemaise foi le maualuga o lena Maota.

E faafeiloai i le paia o Faauluuluga o Matagaluega, le Ofisa o le Fono aemaise i latou o lo o vae ma lima i ai le galuega. Ou te fia faatalofa i lou itumalo o Falelatai ma Samatau, le afio o le paia o le Aiga Tauaana ma la outou Tama, le Falefitu o le Atitagalua, Falelatai ma Tagata o le Vavau. E faatalofa atu foi i le Falefa o le Usoalii ma le Gafa, Fiamē ma le Tamaitai, ae a le nofo a Ituaga ia te Oe Leulumoega. Malo le taputapu, malo le galulue,

malo i lo outou soifua auauna aua le Atua ma lana galuega, a o meafai i totonu o le tatou itumalo tainane le tatou Malo.

Ou te faatalofa i auauna tofofi a le Atua o lo o galulue i totonu o le tatou itumalo. E faatalofa atu i lau Afioga Patele Douglas Fido, lau Afioga Patele Peniamina Sitagata, lau Afioga Patele Tuli Paulo. Lau Afioga i le Taitaifono po o le Sui Taitaifono foi o le Ekalesia Faapotopotoga Kerisiano i Samoa ma atunuu mamao, lau Susuga i le Toeaina, Susuga Tautiaga Senara ma lou faletua. E faatalofa atu i lau Susuga i le Fofoga o le Matagaluega po o le aao tusitusi foi o le Pulega, lau Susuga Opapo Soanai ma le faletua. E faatalofa atu i auauna a le Atua o lo o tauasuina le ipuvai o le ola i itu e fia o le tatou itumalo, lau Afioga i le Tiakono Kalolo ma le Faletua, lau Susuga i le alii Faipule o le tatou Matagaluega Katoliko, Susuga Lafaele ma le faletua, lau Susuga i le Fesoasoani ia Sitivi ma le faletua, lau Susuga i le Faafeagaiga ia Caesar Samuelu ma le faletua, lau Susuga i le Faafeagaiga Livigisitone Toelupe ma le faletua, lau Susuga i le Faafeagaiga ia Talavou ma Vaoafi i le Ekalesia Metotisi i Pata Falelatai, Susuga ia Maota ma Saronā, AOG i Pata Falelatai. E faatalofa atu i le Susuga ia Uati Collins ma le faletua i le Ekalesia SDA i Samatau, Susuga ia Pofa ma Gase o le Epikopo, aemaise foi le Susuga ia Setu ma Malia o le Susuga i le Epikopo o le Ekalesia o le Au Paia o Aso e Gata ai. Malo le galulue, faafetai tatalo, ua manuia faiva o le itumalo, manuia faiva o le tatou atunuu, manuia faiva o la outou sui usufono, ona o lo outou nofo tatalo ma tapuai. O le mea lea e momoli atu ai le faafetai tele.

Lau Afioga i le Fofoga Fetalai, faimai isi o vailaina o le tatalo na aoao ai tatou e lo tatou Alii, “Ia e foai mai ia te i matou i le aso nei a matou meaai e tatau ma le aso.” A matou meaai e tatau ma le aso. O le a le uiga o ia mea? Faafetai o fetalai ia a lo tatou Alii na maua ai lea tatalo ua tatou tatalo ai i aso uma e le aunoa. Faafetai e le o se laina na tusi e se Samoa, a ia e foai mai mea e ai e tatau ma le aso. O lona uiga, ia fua lava le meaai i le aso, fua le meaai i tagata o lo o talisua, o le aso ma a taeao e faapena foi e fua lava le foai e tatau mo le aso.

O se faatupu manatu lea faitau lau Afioga i le Fofoga Fetalai, aua e foliga mai e i ai ma le fuafua lelei, fuafua tatau i lea faitau. Ia ona tuu ane foi lea i le tatou Tala o le Tupe ua taatia i lumamea, e fua le manao i le seleni ua maua, e fua le peleue i le ie ua maua, fua le fasiukeke i le tele o le keke o lo o faasoā. O le feau, ia fuafua tatau, fuafua lelei, faasoā lelei, faasoā tatau. E fua le manao i le seleni ua maua, living within our means.

E momoli lau faafetai i le Afioga i le Minisita o Tupe po o le Afioga i le Palemia ona o galuega tapena maeaea, i le agaga lava ia o le fuafua lelei, fuafua tatau, faasoā lelei ma le faasoā tatau, ma o le agaga foi lena e fia avatu ai se vaivaiga o lenei itumalo ina ia lelei ma faasoā ma le fuafua tatau. A faasaoina ai ni seleni, lelei, ae afai e leai, ia toe faafoi mai se taofi o lenei itumalo.

Lau Afioga i le Fofoga Fetalai ou te talitonu o se fuafuaga lelei ma se faasoā tatau le tofa ua ae i le tatou Malo, e faavaeina le Matagaluega fou ua taua o le Public Enterprises, o se faiga lelei, ma o se faiga e aofia uma ai ma Faalapotopotoga a le Malo ma maua ai le agaga o le galulue faatasi ma tautata ai i le moa o le ala. Aua e i ai nisi o taimi ua tatou iloa ma ua silafia le tulaga ua i ai nisi o tatou Faalapotopotoga. O nisi Faalapotopotoga ua fai lava le Faalapotopotoga ia ua i ai ana Komiti Faafoe ma ua tau le manatu mai i le Malo ma le tulaga ua ave i ai lana faamuamua. O lou taofi, o se fuafuaga lelei

ma se fuafuaga tatau le faaveina o le vaega. E tau aiga le vaega lea ma le PSC, aua o le PSC e pei sa tau centralize functions foi nei e feagai ma mea tau HR a le tatou Malo ae na o le PSC na faatinoga uma galuega i lenei vaega. Ona tauau lea ina faamatuu atu i tua pe de-centralize le faiga o ia galuega. O le tuualalo lava ia , toe silasila ma sasaa le fafao i se faiga e lelei mo Samoa, aua ua maitauina foi i lenei taimi, ua le o nofoia le nofoa o le CEO a ua amata ona faaogaina le Taitaifono o le Komisi e tauaveina le tiute tauave sa feagai ma le CEO. E mafai lava ona faagasolo galuega a le Malo ae i ai se taimi ona taoto lea i lagotonu. A o le matou maitau, e foliga mai ua lelei foi lea fuafuaga ia faaogataata sui o le Komisi mo le faatinoga o ia galuega.

I lau maitau i se isi atunuu, ia e tasi lava se Komisi e tasi lava le sui o le Komisi o tatou e tolu, o lea la ua amata ona talatala i tua e le Malo e faaogaina o latou taimi ma avanoa e faatino ai nisi o auunaga aua le lelei faatino o le faasoa ma le fuafuaga lelei e taatia atu pea i le tatou Malo. O eleele uma a lo tatou Malo e tatou te maua uma i o i le STEC, tatou te maua i le Land Board, tatou te maua i le SLC. Ia pei o lea lava e tau manino po o a ituaiga eleele e vaevae i vala ia, ae tau lava ina taatia atu i ina aua o se faasoa lelei ma se vaaiga lelei o tatou eleele o eleele a le Malo, e taatia atu e tasi lava se Faalapotopotoga tasi se Pulega e latou te tauaveina. Ee i ai le tatou Faalapotopotoga o Taaloga le SSFA. O le tatou complex lea e i uta i Tuanaimato ua tatou iloa uma lava o le sports complex, e ta te vaai atu lava i le le mautonu o i ai lea Faalapotopotoga a le Malo i lata maitau atu i le faatinoga o galuega aemaise foi le lipoti mai i le Palemene, e foliga e le i iloga ona mausali lona faavae. Ia taatia atu pea i le Malo e toe silasila i ai, o fanua ia e i lalo o le Sport Complex atoa lava, e le o i le SSFA lona faasinomaga po o lona puleaina po o lona vaaiga, se i vagana o fale taalo. O le Apia Park o eleele ma fale taalo ma malae taalo o lo o i le SSFA, ia pe le o se faiga lelei lenei nai lo le faiga o lo o fai ai nei, e ta te maitau atu, afai o le agaga e alualu i luma ia le puleaina o malae ma fale taalo, ia toe silasila i ai e mafai lava ona faamatuu uma eleele i le SSFA ia ma totogi e latou le lisi pe afai e le faamatuuina i ai, ia ona faatoa mafai foi lea e latou ona coordinate le faamatuuina atu o eleele. A fesiligia la le SSFA i le tele o vaega eseese po o auunaga la ua faavae ai uta, ia matua aunoa ma se silafia e le SSFA. Faamata e le o se faiga lelei ea le coordinate i lalo o le SSFA o mea uma o lo o tutupu ai i uta, its a sport complex pei ona outou silafia, ae taatia atu foi lenei manatu, o le agaga o le Tala o le Tupe, ia faasoa tatau, fuafua lelei.

O le tatou aoga i seila o la e i le NUS le School of Maritime, o la foi ua fai le aoga faapena e le kamupani vaa. Ua ta maitau atu e i ai foi le latou faamatalaga ua aumai ua mafua ai ona fai, pei o latou ia e local, ia o le SMT po o le NUS, e agai i fafo tamaiti. Toe silasila pea i ai i le fuafua tatau ma le faasoasoa lelei. O le agaga lea e avatu ai se tuualalo i le tatou Malo, e i ai nai tamaiti o lenei itumalo pe toatasi pe toa 2 o teineiti, e ta te iloa o lo o i le vaega lea o le Samoa Victim Support, o lau fesili, o afea e toe aumai ai a matou fanau?

**FOFOGA FETALAI:** Malie le sui usufono, se i avatu le avanoa i le Sui Palemia.

**Tofa Hon Fonotoe Nuafesili Pierre Laufo:** Lau Afioga i le Fofoga Fetalai, e tulai atu ma le agaga faaaloalo, se i fai sina malologa puupuu a le

Afioga i le sui usufono mamalu. O le tulaga lea e i ai a tatou aoga seila, o lea pei ona silafia, o lea o lo o fauina nei le tatou Campus a le tatou Iunivesite Aoa o Mulinuu, o lea la masalo po o se vaitaimi e latalata atu i le faaiuga o lenei tausaga pe a, e maea ai lea galuega tele lava lea, o i la o lea o le a sifi ai le Aoga lea le Maritime School mo le aoaoina o tatou seila aua la ia galuega ia i vaa ia e feoi i fafo Faava o Malo, ae sao le saunoaga a le sui usufono mamalu, o lea foi o lo o i ai le aoga lea a le tatou Kamupani Vaa foi lea e fealua iinei i le va o Savaii ma Upolu ma le agai atu lea i Tutuila, o lea masalo po o ua lua pe tolu tausaga pe a talu ona fai le latou aoga lea e koloni ai seila ia, ae eseese tulaga foi lea faava o Malo, ona e i ai mea o feagaiga faava o Malo o lo o avea ai Samoa ma sui auai, e tataua ona mulimulitai i aiaiga ma tulaga faapena, o lona uiga e fai sina eseese o mea o aoaoga i tulaga ia o galuega a seila le vaega foi lea local ma nai seila ia o lo o maua galuega i kamupani ia i fafo. O le tulaga tonu lena o lo o i ai, ae e le o pau le silasila a le Malo i le tulaga lea e fautua mai ai le sui usufono i aoga ia e lua, pe i ai se avanoa foi lele e agai i le lumanai e silasila i ai ina ia mafai ona fai se faiga pe tuufaatasi pe galulue faatasi, mo le faaleleia atili o le saunia ma le tapenaina o tatou alo ma fanau o lo o galulue i luga o tatou vaa i atunuu mamao.

**FOFOGA FETALAI:** Malo faafetai, e faasao lou taimi, se i tulai mai lau Afioga i le Minisita mo le Faalapotopotoga o Vaa a Samoa.

**Afioga Hon Manualesagalala Mati Tuigamala Enokati Posala:** Lau Afioga i le Fofoga Fetalai, ona o lea sa saunoa le sui usufono i le tulaga i aoga ia, ma sa laga i nisi o saunoaga ia duplicate le faatinoga o aoaoga ia, a o le vaega lea e i lalo o le polokalame lea a le Shipping Corporation, o latou ia ua guarantee lava le latou galuega lea, ae pei la o lau vaavaai i le article foi lea o lo o mafai ona faatino i i e tapenapena ai le afaigaluega lea pei foi la o le Samoa Qualification, e authority le faatinoga o le galuega lea. Sa i ai le fono lea sa fai lata mai nei a le SPC po o le masina ea lea na tea nei o le Central Pacific Shipping Commission, ia o le vaavaaiga lava i ai o le tasi lea o popolega ua i ai o le labor force, ua amata ona - ma e aafia foi iinei ia tatou, o lea ua tele lava ina maua avanoa e agai i fafo, o isi foi o lea e i totonu o aoga ia o lea e lavea ai i polokalame ia. A o le popolega foi lea mo le agai i luma, o le auunaga a le Faalapotopotoga o Vaa, ia ua amanaia tele e le tatou pei ua oo i Cook Island, Tokelau o le charter e alu agai i Manua, alu agai i Atunuu, o lona uiga ua lautele lava, o le ala lea ua i ai tatou aga foi ia ona o lea ua saunoa le Afioga i le Sui Palemia, o polokalame lava e silasila mo le agai i luma, o lea ua faatuina le aoga lea le Maritime lea o le a faamaea lona fausiaina, ia atonu o le taua ia le tapenaga ia toatele e e mafai ona maua le tomai lea, ma le agaga faaaloalo.

**FOFOGA FETALAI:** Malo faafetai. Tulai mai le sui usufono mo Falelatai ma Samatau e faaauu le saunoaga.

**Afioga TAEFU LEMI:** E momoli lau faafetai i lau Afioga i le Fofoga Fetalai mo le galuega lelei o lo o faatinoina nei e le Samoa Victim Support, pei ona ou taua, ae e i ai lava nai fesili e tulai mai pea i lou mafaufau aua o lea e maua le fesoasoani mo nai alo ma fanau, o le fesili, ia o le fesoasoani



seia afea, o afea e toe faafoi ai nai alo ma fanau i o latou aiga? Ia ua fai le aoga, faafetai mo lea vaega. Ou te le faitio, pau lava le mea lau Afioga i le Fofoga Fetalai, o le fesili, o afea la e toe integrate ai le tamaitiiti lea e aoga i i i totonu o le tatou mainstream education system lea e i ai nei, ina ia faaauau pea le olaga aoaoina o le tamaitiiti ma guarantees ia i le lumanai, aua seiloga foi e oo i le mainstream education system a tatou, faatoa maua lea o le suega foi lea o le SSC ma le SSLC na ona alu atu lava i luga maua le sikolasipi ma maua galuega, o lau lea tuualalo, ua ou le iloa po o ai le Minisita o le a ou talanoa i ai. Ae o nai auaunaga ma nai mea o lo o faatino, o auaunaga lelei, ae se i tautuana ia maua pea sina pathway e develop ai le tamaitiiti seia oo ina toe foi ma integrate, back to community, ia ae maua sona lumanai lelei. O le faataatia atu lea i luma o lau Afioga i le Fofoga Fetalai.

**FOFOGA FETALAI:** Ia se i tulai atu le Afioga i le Minisita o ia o lo o aafia tele i tagata o sulufaiga mo e puapuagatia, tulai mai lau Afioga i le Minisita mo Fesootaiga ma Faamatalaga Tekonolosi.

**Afioga Hon Tuisugaletaua Sofara Aveau (Minisita mo Fesootaiga ma Faamatalaga Tekonolosi):** Faafetai atu i lau Afioga i le Fofoga Fetalai mo le avanoa, faafetai atu foi i le sui usufono mamalu e tusa o le laga foi o lea mataupu taua. O le tatou galuega a le Samoa Victim Support, e le o se Matagaluega a le Malo, o le Matagaluega o la e fai ai le galuega alofa o lo o ofo i ai ia le fesoasoani a le tele o tatou tagata i le faatinoina i tupe ma mea e faatino ai. O lau tali faigofie lava i lau saunoaga ma lau fesili, fesili i le aiga sa aumai ai le tamaitiiti, o le fesili tonu lava lena e tatau ona ave i le aiga sa aumai ai le tamaitiiti, ona e lua mea la e i ai, ona o latou sa aumaia le mataupu, o lona lua, o le faaiuga a le faamasinoga. O le mea la e i ai nei a faapea e fai le faaiuga a le faamasinoga e tatau ona aveese mai le tamaitiiti, o le fesili la, o fea e ave i ai? O lea la ua fai ai lea faatuatuaga a le Ofisa o Faamasinoga e aumai le tamaitiiti i lalo e tausi e le Samoa Victim, o le vave lava la o le toe omai o le aiga toe avatu le latou tamaitiiti ia ma le fautuaga a le Samoa Victim, ona ave lea, aua e leai se tupe e tausi umi ai. Ae mo lou silafia i le agai lava i luma tusa po o ua lima nei tamaiti sikolasipi la na ave e le Victim Support i fafo i Ausetalia e totogi e latou na ofo mai ma sue e latou le avanoa sikolasipi, mo i latou la ia ua matutua, ua le mafai ona affiliate e o latou aiga, mo le agai la lea i luma aua e fuafua foi lele e i ai tamaiti e tatau ona see i luga pei o le mea lea ua oo i ai lau saunoaga i le faasologa o le latou aoaoga mainstream ma mea faapena, ua tatau ona see atu i luga, o lea lava la e matou te faia le matou tiute, afai la e oo atu i luga o le matua lea, o fea e alu ai? a o la e otegia mai tua i le mea na mafua mai ai le faalavelave. O le tulaga lena mo lou silafia.

**FOFOGA FETALAI:** Malo faafetai. Tulai mai le sui usufono e faaauau le saunoaga.

**Afioga TAEFU LEMI:** Faafetai lava i lau Afioga i le Fofoga Fetalai, faafetai foi mo le faamalamalama ua malamalama ai foi lea vaega, ae taatia atu pea ia le agaga foi lenei ina ia mautinoa e le na o le toafa tamaiti e maua sikolasipi, ia ae ua sikolasipi uma tamaiti, ia pe a maua avanoa latou. O le.....

**FOFOGA FETALAI:** Se i tulai mai lau Afioga i le Palemia.

**Susuga Hon Tuilaepa Fatialofa Auelua Lupesoliai Aiono Neioti Sailele Malielegaoui:** Lau Afioga i le Fofoga Fetalai, e tele lava le tu maaleale o mea ia o le afaina o nisi o fanau, aemaise pe a faapea o lea ua usu le tamaloa i lona afafine, o le matua tele o le faaletonu i ina, aua afai e toe faafoi loa la i le aiga, e leai se puipui e malu ai, aemaise o nisi o taimi ia ua foi atu pe lua tausaga e falepuipui ai ona toe foi mai lea, o la e i ai lava le afafine i totonu o le siosiomaga lea, e tele lava la le lavelave o mataupu ia, e le mafai lava i le tulaga foi lele o lea e tatou te talanoa e faa-'alo'alo i mea faapea, a o le tele ia o le tulaga lea aua e oo mai foi ia te au mataupu faapenei, ia ona ou nofonofo lea ma ou mafaufau i le faigata tele o le mea lea, o mea ia e fai mai feusuaiiga i le va o le tama ma le fanau.

**FOFOGA FETALAI:** Ia tulai maia le sui usufono mamalu e faaauau le saunoaga.

**Afioga TAEFU LEMI:** Faafetai i lau Afioga i le Fofoga Fetalai, e tele lava le mataupu pei ona saunoa le Taitai o le Malo, e i ai lava le vaivaiga foi lele o lea e tatou te talanoa agai i le sefulu tausaga ma tua atu, o lea lava e i ai le teineitiiti lea i totonu o le Victim Support, e faapefea lona ia lumanai ma tulaga faapena, ae o lea ua saunoa le Afioga i le Minisita ua fesoasoani foi le Afioga i le Palemia, ia tatou talosia ia le faamoemoe o le Samoa Victim Support, ua faafofoga mai foi latou, e momoli le faafetai mo le auunaga.

Lau Afioga i le Fofoga Fetalai e tolu vaega i Samoa e test ai le suavai, le suavai lea tatou te taumafaina ma tatou feinu ai, o le Samoa Water Authority, Ministry of Health ma le SROS o le tatou Fale Suesue foi Faasaienisi. Ia e tuu atu pea faapena, o le agaga o le Tala o le Tupe e faasoasoa tatau ma fuafua tatau, o le agaga lena se i toe silasila i ai, aua e moni o lea e i Samoa uma nei vaega, o le tatou SROS, o le tatou Scientific Research Organization lea, ua uma ona certify ma silafia, ma tele lo latou sao, ma faasaoina ai foi seleni a le isi vaega lea e tausailia ni a latou suesuega agai i le vai.

Faafetai mo le galuega tele ua fai nei i le EPC. O le galuega lea ua fai, ua outou silafia ma tatou iloa ua leva lava ona i le pipeline e i ai le taimi e faatino ai. E mafua lea tala ona o nisi foi auunaga a le Malo e faapena, o lea lava ua faamatuu i tua lea auunaga ae concentrate le Malo ia i lana ia vaega o lena auunaga. Ou te iloa lava o tulaga sa i ai le EPC ma e faamalulu i nisi o le aufaigaluega, ae momoli lau faafetai i le fuafuaga tatau a le Malo i le faasoa lelei a le Minisita mo le faatinoga o lea vaega, aua e faamatuu i tua le power generation ae concentrate le EPC i le power distribution ma isi uma vaega faapena i le lelei o le auunaga, ma e taatia atu foi i le faagasologa o lo o faataatia ai nei le restructuring lea o lo o faaalu. Na pau o le mea o le momoli o lau faafetai ia i latou o lo o faatinoina lea galuega fita, e le o se mea faigofie le faamalolo o le aufaigaluega. Ae momoli lau faafetai ia i latou ua malilie ma tuuavana foi e tuu mai le EPC seia go through i le process lea ua i ai, ae faamalo foi ia i latou foi ia o lo o taulamua i lau Afioga i le Minisita aemaise foi o le CEO e tusa ai o ia galuega fita o lo o faatino.

O le Matagaluega o Faatoaga, ua tele upu i manu ae itiiti upu i mala i lau Afioga i le Minisita. Ou te fia talanoa i lau Afioga po o le a le mea ua tupu i le lala foi lea o le tatou Ofisa i nuu i tua. Sa i ai la le Ofisa sa i Matautu

Falelatai, ua aumai le Tala o le Tupe, ua leai se lala o i Matautu Falelatai. Sa ou fesiligia le CEO, ua aumai foi le tali, ae na manatu lava ona o la e tapuai mai le itumalo ma faafofoga mai, o lea ua ou fesili atu i lau Afioga i le Minisita, a o se tali e tau faamalamalama ai si ou itumalo i le mafuaaga ua aveese ai le lala lea ou te le iloa po o se extension centre po o le a le tauga e tau ai, ua aveese mai.

E momoli foi lau faafetai i le Afioga i le Minisita mo Aoga, Taaloga ma Aganuu, sa ou tatalo lava i le auala lea e agai i le kolisi lea o Aana II i Apolima, e le maua ai se palota a se isi pe a fai le auala lea e ala lea i lau talosaga, ae faafetai ua fai, a o le Minisita mo Aoga ma le matagaluega sa tali mai, e ui ina le i valitaina, ae sa tau lelei ma mafai ona toe feoai ai taavale. O le mea sa i ai, se i vagana le palau a le Esetete Tausi na mafai ona feoai ai. A o le taimi lenei, o lea ua mafai ona toe feoai ai taavale a nai aiga ma nai faiaoga. O le mea lea e momoli atu ai le faafetai. Ia o le mafuaaga foi lea e ala ai ona tatalo pea lenei Komiti o Aoga aemaise o le itumalo ona o le taumamao. O tatou pasi ia sa maua mai i le tatou fonotele sa fai, ina ia maua se fesoasoani mo le itumalo e le gata i aoga, ae taumamao foi lou itumalo aemaise o pasi ia i le taimi e tuua ai aoga ma tulaga faapena. E le tu auala foi faleaoga, e tu i tua, e agai i tua faiaoga ma tamaiti ma matua. O lau tatalo atu, pe le i ono maua lava se fesoasoani. O le faigata ia o le environment lea e i ai si aoga lea, e le gata i Aana Nu.2, a o Aana Nu.1 foi, leaga foi o la e i totonu o le lotolotoi o kolisi mauaululuga la e o Nuuasala ma Leulumoega. A tatou talanoa la i lola tamaiti aoga o aoga na, toetiiti pai i le 1,000 tamaiti aoga i Leulumoega, toetiiti pai i le 1,000 tamaiti aoga o Nuuasala ona sau loa lea i lalo i le 500 pe 400 e talanoa ai i aoga ia a le Malo. Aisea? E leaga o la e i ai pasi a na aoga, leaga o la e very well resource na aoga, e i ai foi ma latou pasi e o atu i tua, ona omai lea o na pasi ma tamaiti aoga a Leulumoega ma Nuuasala ma talotalo atu i tamaiti aoga a Aana la e faatali le pasi e omai ai.

O le agaga lea lau Afioga i le Fofoga Fetalai, se i silasila ane po o le a se faiga, a o lea ou te tau atua le isi vala lea o lea e faigata ai aoga ia i tua.

Lau Afioga i le Fofoga Fetalai, e momoli foi lau faafetai i le Minisita mo Faatoaga ona o le tatou suesuega i le talo numera tasi lea sa tau e tatou o le...

**FOFOGA FETALAI:** Malie lava le sui usufono se i tulai atu le faauilavea a le Afioga i le Taitai o le Itu Agai.

**Afioga Hon Palusalua Faapo II:** E faamalie atu i le sui usufono, e ese le matagofie o lau lauga. Ae ou te fia iloa, o a pasi ia e talotalo mai i aoga a le Malo? O ai e faatinoa pasi ia? O ni pasi o le auala po o ni pasi faapitoa mo aoga ia a le Ekalesia? O mea ia o lea ou te fia malamalama ai aua a o atu la pasi ia, talofa i tamaiti o aoga a le Malo. Ae ou te fia malamalama po o a ia pasi.

**FOFOGA FETALAI:** O mea o school bus. Taefu, faaauau le lauga, o lea ua latalata ina uma lou taimi, aua le...

**Afioga TAEFU LEMI:** Ou te iloa lava o la e silafia e le Afioga i le Taitai o le Itu Agai pasi nei ou te talanoa ai. Ae ou te toe foi atu lava e faafetai i le Minisita mo Faatoaga, ona o le talo numera tasi lea sa i ai a tatou, e moni lava o le talo numera tasi, ae sili lava ona manaia le talo numera lua, aua o le

numera tasi e fai si malo, a o lea la ua maua le tatou talo fou e suia ai le numera tasi. O le tatalo lava ia aveaveai galuega lelei ma se i vaai i le maketi lea e i Niu Sila, le tatou talo mo le maketi lea e i Niu Sila. Tautuana ma lau Afioga aemaise foi o le Matagaluega le talo lea e ave ia siaki lelei, aua le tatou tuuavanoa ona o le tele o containers ona le lelei lea o le vaauga o le quality o le talo e ave ina ia taofi pea le maketi lea, ia toe lelei mai le maketi i isi atunuu ae ua mausali le maketi a tatou.

**FOFOGA FETALAI:** Toe lima minute o le sui usufono.

**Afioga TAEFU LEMI:** Lau Afioga i le Minisita mo le Soifua Maloloina, e momoli atu lau faafetai tele lava i lau Afioga i le Minisita. Sa ou talosagaina se fesoasoani a lau Afioga ina ua ou asia le gasegase o se tasi o matai o lenei itumalo, faatoa 40 tausaga na aafia i se faalavelave tau taavale, ua faaletonu pe gau'i vaeatu le faafofoga a Samoa ponaiivi i totonu o ona foliga. E faamalulu atu ou te le iloa igoa o lena vaega tonu, ae peitai ua tea i tua le tama ae faamaitemea pea i le toe pa mai o le toto vaeane le paia o le Maota, e piliki lava mai Falelatai kilii mai i Apia. E faatolu ona kilii mai seiloga lava e uma mai le toto mai le tino ona faatoa mapu lea o si uso. Ou te faamalulu atu ma faatulou atu i lea vaega, ae ou te faafetai lava i lau Afioga i le Minisita. Na ou maua loa lea tulaga, ou alu atu loa i lou Ofisa fai atu ma le ta tusi ma ou tatalo atu i lau Afioga, ou te talitonu lava ua le manatu tele le Matagaluega i sia tamalii o lenei itumalo. O le avatuga lona lima i totonu na tipi ai lona faai ae faamanava ai a ua le faia se fua i le vaega tonu e mafua ai ona bleed. Ua tali faaloalo lau Afioga, ua talimanao lau Afioga ua manuia le tama i Niu Sila, ua fai lona taotoga a ua toe taoto faaopopo se i toe fai se fua i le faai lea ua te i lava ua tipi fua. Ia, a o le tatalo foi lena i lau Afioga. O le taeao nei, sa ou oo mai i le Fono ma tausaili foi se avanoa i le maliu sa fai o se tasi o faletua o se sui usufono mamalu o le Maota nei. Sa talatalanoa foi i le tulaga sa i ai le falemai. O lau tatalo lava i lau Afioga, a le mafai ona fai le mai, fai le lipoti ma aumai i le Board latou te iloiloaina ma logo mai le Minisita, ae aua le tuu ai i o ma faainu le fualaau ma tautau le aivi ae leai se fuafuaga e fai i manua ia e mafua ai le mai. O lau lea tatalo i fomaini, se e le o ia i tatou uma le atoaga, o lau lea tatalo, the most experienced doctors o la e i tua. O lau tatalo i fomaini, tatou alo ma fanau, se i tautuana ma outou, a le mafai le togafitiga, lipoti, e tasi le itula e tuai ai lau lipoti, e ono maumau le soifua. E tasi le aso e tuai ai ae maumau le soifua. O lau lea tatalo lau Afioga i le Fofoga Fetalai se i tautuana ma le Matagaluega, a o faafofoga mai foi fomaini, o lo o feagai ma le auaunaga. A i ai le mai i le falemai, o lau fautuaga i le Maota, aua e te alu e asi i le taeao, you are most likely to be rejected pe a e alu atu e asi lau mai i le taeao. A o nisi gasegase, o faifeau, o matai o lou itumalo, o la outou afioga, o faletua, ae a ta oo atu i itula o le taeao o la e fai le asiasiga, e taofi lava ita, e sili lava ona manaia pe a ta alu i le afiafi, o le tatalo, o la e faatino a tatou asiasiga e taofi uma ai le falemai. Ia taatia atu ia i lau Afioga, o le a se isi faiga e mafai ai ona faamalulu mai i le vaega tonu ua oo i ai le asiasiga a alii ma tamaitai fomaini ona taofi ai lea o le asigamai lea e alu atu. O le tatalo lea i lau Afioga i le Minisita, ua ou taua le falemai....

**FOFOGA FETALAI:** Ia, e faasaoina lou taimi se i tulai mai le Afioga i le Minisita mo le Soifua Maloloina.

**Afioga Hon Tuitama Talalelei Tuitama:** Lau Afioga i le Fofoga Fetalai, ne i te i ua galo ia te au ona tali atu, o lea e tatau ona avatu se faamalamalamaga i le tulaga lea o asiasiga. Silasila foi, e le na o Samoa, o lo o fai uma lava e isi atunuu ona e i ai lava taimi faatagaina mo asiasiga e taga ai le falemai. O le taimi la lea ua avanoa ai, a o le tulaga i le taeao, o le tele ia o tapenaga a le falemai, e le gata o galuega a le au tausisoifua mo le tapenaina o ni gasegase, a o le taimi foi lea o asiasiga a fomai e asiasia. E le talafeagai la ona faataga asiasiga ia i le taeao, aua o ituaiga asiasiga ia e saunoa i ai sui usufono, e le o ni asiasiga foi nei taitoatasi pe taitoalua, a o le tele o isi asiasiga o le aulotu atoa e o atu e fai le lotu i totonu, e tumu atoa ai totonu o potu ae le iloa e fomai po o fea le mea e faaofiofi atu ai e vaai isi gasegase lea e i tafatafa o le gasegase lea o lo o aafia i vaega toatele faapena.

O le tasi foi itu, o le tele o togafitiga ia e faatino i le taeao pe a uma ona tapena le gasegase tausisoifua ma sauniuni pe uma le tausiga i le tino i le taeao ona o atu loa lea o le asiasiga fai le faatonuga mo le tauaveina o togafitiga mo taimi totoe o le aso, e faapena foi ma isi taimi o le aoauli. O le mea la lena e tele ai asiasiga e faatino i le aoauli i le taimi ua maea ai ona faia fuafuaga faifaipea o le tausiga o gasegase ona faataga loa lea o le mamalu o le atunuu e asiasi atu ma tala atu aao e asi a latou mai.

E pei o le tulaga lea lau Afioga, e tatau lava ona i ai ni taiala e taofia ai foi le soona tumutumu vale o totonu o potu o gasegase i le taimi o lea e faatino ai galuega a le aufaigaluega. Ma lou faaaloalo.

**FOFOGA FETALAI:** Malo faafetai. Tulai mai Taefu, toe lima minute ona tatou taunuu lea i le tatou taimi malolo, ae faaiu maia le saunoaga.

**Afioga TAEFU LEMI:** Faafetai lava i lau Afioga i le Fofoga Fetalai. Na ona faataatia atu faapena, aua o lea lava ou te talanoa au ia i le asiga mai o a outou Afioga ma ita lea e alu e asi le mai, e le o ni aulotu ma tulaga faapena ua tatau ai ona taofi. Ae silasila foi i le faatinoga o asiasiga a alii ma tamaitai fomai, aua afai o le asiasiga lea na fai nei i le mai ae tipi ai le faai, ia, se i vaeane le Maota, o le ituaiga quality o le faatinoga o le auaunaga, aua o le asiasiga e mafai ona faatino i le itula ae alu ai le aso atoa....

**FOFOGA FETALAI:** Malie le sui usufono se i tulai mai le faauilavea a le Afioga i le Minisita mo le Soifua Maloloina.

**Afioga Hon Tuitama Talalelei Tuitama:** Lau Afioga i le Fofoga Fetalai, mo le pui puia o le aufaigaluega leaga o lea ua saunoa faalua le sui usufono mamalu i togafitiga, o mea ia o confidential issues e talanoaina ma le fomai i le aiga o le o lo o aafia i tulaga ia, ma o lea foi ua uma ona faamalamalamaina, ona e i ai foi mafuaaga na ala ai ona faatinoina togafitiga ia, e le mafai ona talanoaina i totonu o le Maota. o le fesoasoani atu lea i le sui usufono o lo o saunoa nei, ona e i ai tulaga faaeteetegata e le mafai ai ona tatou soalaupuleina togafitiga o lea sa faatino ona e i ai mafuaaga. Ma lou faaaloalo lava.

**FOFOGA FETALAI:** Ia, faaiu maia le saunoaga Taefu.

**Afioga TAEFU LEMI:** Faafetai. Ou te faamalulu atu foi i le Minisita, ona e maaleale ma taua le auaunaga lau Afioga i le Minisita o le ala foi lea e ala ai ona faamulimuli i lau Afioga sou manatu. Ia manatua foi e i ai le ta talosaga ua leva lava ona faataatia mai o se medical centre, po o se medical clinic or whatever however small you want it, lea e talosaga mai mo Falelatai ma Samatau i lea vaega o le itumalo. E le o tagisa lava le itumalo i se isi mea, o le auga o le tatou Tala o le Tupe, ia faasoa lelei ma fuafua tatau. E i ai le tatou falemai lea e i Faleolo, ae ua ou taua ona e fai lava si mamao. A o le falemai lea e fau i Faleolo, ae afa itula e te savali ai i le isi falemai i le isi falemai. E afa itula ta te savali mai ai i Leulumoega ta te alu i Faleolo, ae itula ou te sau ai mai Falelatai i Faleolo po o Leulumoega, e maumau ai le soifua. O le faasoasoa lelei ma le fuafua tatau, o fea le mea e tatau ona tuu ai nei auaunaga sili ona taua aua le tausiga o le soifua maloloina o le mamalu o le atunuu. O lau talosaga lea na ona toe faamanatu i lau Afioga....

**Afioga Hon Tuitama Talalelei Tuitama:** Lau Afioga i le Fofoga Fetalai, leaga o le mataupu lea e le fou lau Afioga, o lena foi e silafia e lau Afioga o lo o taumafai mai pea lava le sui usufono nei i le tulaga lea i le fale lea e faaogaina i Falelatai. Ia ou te le tio foi i le taumafai mai o lona ia lava lea tiute, e faapea uma lava tatou uma tatou te mananao ia tu mai le falemai i tafatafa o tatou fale, oso atu loa i ai ae aua ne i savali e alu e sue le falemai.

Ma ua talafeagai foi aua o le futia ua sola, o i foi i Falelatai sa i ai le falemai, pei lava ona silafia e le natia sa i ai foi le falemai i Lefaga, a ua toe suia ona o nisi fuafuaga, ma e le mafai ona auiliili nei mafuaaga o le fesuiaiga o ia faiga, a o mea uma lava ma taumafaiga uma ina ia faaleleia ma faaleleia atili le auaunaga. O le a la foi lea na fai ai ia fuafuaga faapea.

O le tulaga foi lea i le falemai i Faleolo, o le agaga maualuga lava lea na ala ai ona fai le falemai, ina ia faalatalata atu i Falelatai, a ia aua foi na o Falelatai, a ia avea foi ma auala e faatino ai le faamoemoe o le Malo i ni faalavelave faafuasei e ono tutupu mai i totonu o le tatou malae vaalele. E le gata la i ni faalavelave faafuasei ne i te i ua pau se vaalele, aua sa tupu foi muamua, sa i ai vaalele na pau ai i ina, sa tau tuli mai lava Apia e omai i ai e manunua. A o le aoga ia, o lea ua tatou faalogo nei ua tele faamai fou lea ua amata ona oo mai i inei, o le taufaafefe matautia lea ua feagai nei ma le lalolagi atoa, o le Ebola. O le Ebola la e i o i West Africa, ae a faapea e taunuu mai le Ebola, e 10,000 tagata ua maliliu i le Ebola. E oo mai loa se Ebola i inei, e faapefea la ona puipuia? A aumai nei i Apia e aumai Motootua e oo mai Motootua ua pesia uma mai lava tagata mai le malae vaalele e oo mai i i. Ia, o le agaga lena, o le falemai lea ua fuafuaina, a i ai loa se tulaga faapena e tulai mai i totonu o le malae vaalele po o e faimalaga mai ua aafia i se gasegase e ono aafia ai le atunuu, ia isolate mai le malae vaalele. O le faamoemoe lena na ala ai foi ona fai i le malae vaalele, ae a ave la i Falelatai e tuu ai le falemai, o lona uiga la, o le a avatu ai ma le faamai i o i Falelatai ma afaina uma ai le paia ma le mamalu o le itumalo. E tatau la ona faafetai le sui usufono o lea ua tu i Faleolo le falemai ua mamao ma Falelatai, e saogalemu ai le afioaga, a o la e foi o lo o taulalata atu aua o lo o tele pasi, aua e leai ni pasi e o i Falelatai, aua e le o tu se taulaga i Lefaga po o talaatu o Falelatai o lea e tu i Apia nei. O pasi uma lava la a Falelatai e agai mai i Apia.

O lona uiga, ua matagofie... Sina afa itula lena se i faauma atu lau...

**FOFOGA FETALAI:** E faamalulu atu i lau Afioga i le Minisita, ona o lea ua tatou taunuu mai i le tatou taimi malolo, paga lea e taumafai atu lava e tau faapuupuu mai le tulaga o saunoa na saunoa i ai sui usufono, ae le mafai foi ona tuua le faamalamalama a le Malo. E ui i lea, o le a faaauau lau tali i le aso a taeao. E faamalulu atu foi i le sui usufono mo Aana Alofi Nu.3 o le a e faia le tatou tatalo faaiu e faaauau ai lou lagona i lenei itula afiafi.

E faamalulu atu i le mamalu o le tatou Maota, e talitonu le faamoemoe o lea ua tatou tini taunuu i le tatou taimi malolo o lenei aso. E momoli atu le agaga faafetai ma le faamalo i le tauavagameaina o le tatou galuega i lenei aso. Faamalo le tofa, faamalo le malele, faamalo saunoa. O a foi tiuga o le vaatele e aumai avatu, a o le agaga o le Atua ia tatou maua pea le loto gatasitasi aemaise o le agaga felagolagomai. O a foi upu ma tala na faalele i lenei aso, ia fale i le Atua ma lona finagalo, a i ai ni lelei, ia viia le Atua. A i ai ni faaletonu, ia tatou faatuatuanai i nuu le aina, e sau malama ma se taimi ona taua lea aua le timaiga o tuleiga ma saunoa sa outou saunoa i ai ina ia ave se fautuaga lelei mo le Malo ma le Palemia. O a foi tulaga i le taumafai mai o le Palemia ma le mamalu o le Kapeneta e faapupula ma faamalamalama, e faapena lava aga a le tatou Fonotaga, a manino lava ma malamalama se mataupu, ia toa le tai ma manino le mata o le vai.

O lenei aso e momoli atu le faafetai tele i le paia ma le mamalu o le tatou Maota Fono o lea ua tatou taunuu i le tatou taimi malolo, tatalo i le Atua ina ia taitaiina le tatou soifua manuia ia tatou toe aofaga potopoto i se taimi o le aso a taeao pe a tatou aulia i Lona alofa ma Lona agalelei i le paia ma le mamalu maualuga i Ofisa Sili o Pulega i ona tupu ma ee, malo le onosai. E faafetai atu foi Samoa i lau tapuaiga i lenei aso, o lea ua ae ma le manuia faiva o lau Palemene aua la outou tapuaiga, ae ou te tatalo atu i lau Afioga Toeolesulusulu e tulai maia e fai se tatou tatalo faaiu ona tatou malolo ai lea.

*Na motusia Felafolafoaiga ina ua tolopo Taulumaga a le Fono Aoao i le itula e 7:05 i le po seia aulia le Aso Lua, 23 Iuni 2015 i le itula e 9:00 i le taeao.*